

इल्हने सम्यक् इतिहास

व

श्वया ज्याइवः



लेखकः

हेमराज शाक्य

इलहने सम्यक् इतिहास व श्वया ज्याभवः

चवम्हः
हेमराज शावय

प्रकाशकः
वेङ्गारत्न शावय

प्रकाशक:— बेखारतन शाक्य

झमिखेल, ललितपुर

फोन नं. ५-१२६७८

बुद्ध सम्बत् २५३५

नेपाल सम्बत् १११२

शक सम्बत् १९१३

इसवी सन् १९९२

बिक्रम सम्बत् २०४८

प्रथमबार १०००

मूल्य:—



थाकू:— संकटा प्रेस, ख १-८३ टेबहाः, येँ-३



हिरण्यवर्णं महाविहारसं च्वंगु स्वाभाजुया देगः

इल्हने सम्यक्या विषये निगू शब्द

प्राणीमात्रयात दुःखं मुक्त यायगु उपदेश बिया बिज्यापि बुद्धपिनिगु पुण्यभूमि नेपाल, विपश्चीबुध्दन्तिसें कया शाक्यमुनि बुद्धयागु जन्मनापं सम्बन्धित विभिन्न घटनाक्रमं विश्वे अति प्रसिद्ध जुयाच्चंगु खः ।

शील समाधि व प्रज्ञायात थःगु जीवनया अभिन्न अंग याना बुद्ध, धर्म व संघया शरणे वना थःगु व मेपिनी जीवन भिका बोधि-सत्त्व आदर्श न्ह्यःने तया बिज्यापि बुद्धपिनिगु गुणानुस्मरण याना नेपायापि बौद्ध उपासक उपासिकापिन्सं सम्यक् न्यायका वैच्चंगु नेपालदेशया विश्वेगनं मदुगु सांस्कृतिक, धार्मिक व सामाजिक दंशु खः ।

भिक्षुमहासंघयात भोजनया निम्ति आमन्त्रणा याना अन्न, मिष्टान्न, फलफूल दानयाना दानशीलता बृद्धियाना परस्परे माया व स्नेह दयेका देशे मंत्री, करुणा, मुदिता व उपेक्षाया भावं देशे च्वंपि सकल मनुष्यपिन्त अनित्य दुःख व अनात्मभावपाखे प्रवृत्त यायेगु बौद्ध संस्कृतिया विकासे सम्यक् छगू महान् नखः खः ।

भाष्करदेववर्मा जुजुं बाह्रौं शताब्दीपाखे हिरण्यवर्ण महा-

विहारया स्थापना जुसेली ललितपुर महानगरया समस्त दीपंकर
तथागत व शाक्यमुनि बुद्धपिनिगु भव्य मूर्ति प्रदर्शन याना सकल
शाक्य, वज्राचार्यजुपिन्त सम्यक् निमन्त्रणा याना अन्न, मिष्टान्न,
फलफूल, भैषज्य इत्यादि दान यायेगु प्रथा न्हापा भगवान् बुद्धया
पाले भिक्षुसंघयात निमन्त्रणा याना भोजन दान यायेगु प्रथा लुमंका
व्यू । नागवाहा अर्थात् इल्हने वसुवर्द्धन महाविहारया प्राङ्गने
प्रत्येक ५।५ दैय् न्याइगु सम्यक् निश्चयनं नेपालया बौद्ध संस्कृति
छगू अद्वितीयगु सांस्कृतिक तथा धार्मिक नखः खः ।

काठमाण्डू सहरें प्रत्येक ४।४ वर्षे इटुम्बहा, लगंब्रहा व
वटुबहाया पालंपाकथं स्वयम्भू भुइख्यले जुईगु सम्यक् लिपा चले
मजुया जुजु पृथ्वीनारायणशाहजुं सरकारया पाखें आर्थिक सहायता
बिया १२।१२ वर्षे चले यायेगु उजं दयेका व्यूगुकथं थौंतक थ्व
भुइख्यःया सम्यकनं चलेजुयाच्चंगु दु ।

थ्वहे सम्यक्या इतिहास मालायंकेबले भारतया नांदैम्ह जुजु
हर्षवर्द्धन वाराणसी इस्वी सन् ६०० स गंगानदीया किनारे समस्त
बौद्धभिक्षुपि बिज्याका थथेहे विशाल दानशाला दयेका सम्यकुदान
न्यायेका वंगु इतिहासं कनाच्चंगु दनि ।

कालया प्रवाहे फुक्क न्ह्याना फुनावनाच्चवंथें भारते बौद्ध
परम्परा मदया वंसां नेपाले आतक्क रक्षायाना तःगु दनि । तर
थननं थ्व सम्यक्प्रथा घिटिघिटि जुया म्वाय्माःगु अवस्थाय् थ्व
प्रथायागु ऐतिहासिकताया वृत्तान्त पूजाविधि व दीपंकर बुद्धपिनिगु
विभिन्न बहा बहीया मूर्तिया बलः समेतं विस्तृतरूपं व्याख्यायाना

भी नांदंहा पं. हेमराज शाक्यजुं चवया बिज्यागु "इल्हने सम्यक्या इतिहास व थ्वया ज्याइवः" नामक ग्रन्थ पिकया तःधंगु उपकार याना बिज्यागु तस्सकं प्रशंसनीय जू ।

नेपाया नांदंहा लिपिविशेषज्ञ, इतिहासकार अनुसन्धाता व बौद्ध विद्वान् भी हेमराज शाक्यजुं नेपाया बौद्ध संस्कृतिया ग्रन्थ चवया भीगु बौद्ध संस्कृति, साहित्य व कलायानं संरक्षण याना बिज्यागु तस्सकं चवछायेहेगु खँ खः । श्री हेमराज शाक्यजुं अनन्त-कालतक्कं थथेहे नेपाया संस्कृति व धर्मयात थिका तयेफयेमा धका प्राशिका याना ।

प्रा. आशाराम शाक्य
सदस्य सचिव
लुम्बिनी विकास, काठमाण्डू

जिगु थःगु खँ

श्री स्वयम्भू आदिबुद्ध ज्योतिरूप विराजमान जुयाच्चंगु बुद्ध-जन्मभूमि नेपालदेशया स्वनिगल मध्ये सर्वप्राचीन अशोकपट्टन घालसां ललितपुर महानगर यलदेश खः । थुगू यलदेशे दर्ईच्चंगु गुलिनं ननि, लिबि लाछि एवं चुक मध्येसं थःगुहे विशेषता दर्ईच्चंगु प्राचीन चैत्य, भव्यरूप बुद्धमूर्ति, मानवनिर्मित गुफायाकें सहितगु हिति व विहार, स्वागतमण्डप, सतःफले आदियाकें सुशोभित जुया च्वंगु पवित्र रमणीय स्थल खः । थनहे यलदेशयागु, गौरवमय सांस्कृतिक इल्हने सम्यक् व अले धार्मिक, सांस्कृतिक, ऐतिहासिक तथा पुरातात्त्विक स्थलतय्गु निरीक्षण व प्रदक्षिणा याःवनेगु थःगुहे विशेषता दर्ईच्चंगु दीपंखा गमनथेजागु भव्य समारोह जुईगु ऐतिहासिक स्थाननं खः । थुलिजक मखु अज अलौकिक महिमां जाया-च्चंगु नीलथुसा व सम्यक्न्यायका सिद्धवंगु जःसि थौतकनं ल्यना च्वंगु दनि । लिसें इलेबिले वृष्टि व अनावृष्टिया लक्षण क्यना च्वंम्ह नागराजयागु चित्रमय आत्मा अंकित जुयाच्चंगुनं मदुगु मखु । गुकिया कारणं इल्हनेयात नागबाहाल धका प्रसिद्ध जुया-च्चन । खास थुगु विहारया नां खः 'वसुवर्द्धन विहार' ।

थुजागु महत्वपूर्णगु इतिलंहे इल्हने ननियागु ऐतिहासिक स्थाने न्यादँय्छक न्यायका वईच्चंगु सम्यक् महादानपर्व सम्यक्या संक्षिप्त इतिहास अले थ्वया विधिविधानया ज्याइवः समेत च्वया जनसमक्षे प्रस्तुत याय्खँगु थ्व हर्ष व गौरवया विषय खः ।

थुगू सम्यक्धर्मया परम्परा व इतिहास अध्ययन व अनुसन्धान यांना स्वतधाःसा थ्व खँ स्पष्ट जूवईकि— गुलिनं नेपाःया बौद्ध विहारं मानेयाना वईच्चंगु रितिथिति, धर्म संस्कृति, गुलि दु उपि व्याकवमध्ये दकले सकले तःधंगु महत्वपूर्णगु “सम्यक्महादान पर्व” सिद्ध जूवई ।

अज थुगू सम्यक्महादानया रितिथितिइ दुहाँवना अध्ययन अनुसन्धान यांना स्वतधाःसा बुद्ध आज्ञा जुयाबिज्यागु श्रावक, प्रत्येक, महादान एवं वज्रयान सम्बन्धी ज्याखँ मुलाच्चंगु खनेदई ।

थुकी आदिबुद्ध श्रीस्वयम्भू भगवान् बुद्ध तथा अतीत बुद्धपिगु प्रतिनिधित्व यांना बिज्याम्ह श्री दीपङ्कुर तथागतयात सर्वोपरि स्थान विया मानेयाना वईच्चंगु खने दु । अथेहे वर्तमान कालया बुद्धपिनि प्रतिनिधित्व यांना बिज्याम्ह वसपोल शान्तिनायक शाक्यमुनिबुद्ध व भविष्यत्कालया बुद्धपिनि प्रतिनिधित्व यांना बिज्याम्ह अनागतबुद्ध आर्यमैत्रेय आदि अनेक बुद्ध बोधिसत्व आर्यतारा, प्रज्ञापारमिता, वसुन्धरा तथा आर्यावलोकितेश्वर, आर्यमञ्जुघोष आदिया सुन्दर भव्य कलात्मक मूर्तित उपस्थित यांना तईतःगु खने दयाच्चनी । लिसें सुईस्वकोटि देवतापि व अले नेपाःया समस्त प्रजाया हृदयप्राण राष्ट्रनायक श्री ५ महाराजा-

धिराज व लिसें जगतहितसुखया निर्मिन्ति स्थापना जूगु महाकरूणा व शान्ति प्रधानगु बुद्धधर्मया शासन निरन्तर समुन्नति यायगु ज्याखँय् सदा तत्पर जुयाच्चं पि आर्यसंघ, जिनसंघ, गुरुवज्राचार्य, शाक्यभिक्षु श्रामणेर, ब्रम्हचर्यभिक्षु, चैलकभिक्षु आदि उपासक उपासिकापि समेत उपस्थित जुयाच्चनीगु जुल ।

थुगु सम्यक्महादान महोत्सवया दुने बौद्ध दर्शन, बौद्ध कला, बौद्ध संस्कृति, बौद्ध धर्मया विशुद्धभावनाया अनुपम प्रदर्शन कयना वईच्चंगु जुल ।

घात्थें धाय्माल धासा थूजागु किसिमया बौद्ध संघायन बौद्ध सम्मेलन, बौद्ध जागृति बौद्धदेश—(चीन, जापान, मंगोलिया, कोरिया, तिब्बत, भारत तथा श्रीलङ्का, वर्मा, थाइलैण्ड) आदि थासे दुर्लभ धाःसां अप्व जुईमखु । अतएव थ्व सम्यक्दान महोत्सव नेपाःया थःगुहे किसिमया देन दईच्चंगु महत्वपूर्ण आदर्श खः, विशेषता खः, गौरवमय परम्परा खः ।

थुगु सम्यक् महोत्सवथें नेपाले खनेदयाच्चंगु धार्मिक सम्प्रदाय—शैव, वैष्णव, शाक्त, वैदिक, गाणपत, पाशुपत एवं सौर सम्प्रदायपिन्सं थथे थःथःपिनी देवीदेवतापि विशाल सुन्दर कलात्मक सुवर्णमय सजीव मूर्ति छ्गु थासे एकत्रित याना थःथः संघ संस्था गुथियार संघमुना पूजासत्कार व दानप्रदान यानावईच्चंगु खने मदु धयां अत्युक्ति जुईमखु । थुगु सम्यक् नेपाःया बौद्ध-इतिहासे नेपाःया बुद्धधर्मया महान् उदारता दानशील भावनाया ज्वलन्त अनुपम उदाहरण खः ।

अशान्ति जगते शान्तिव्यवस्था स्थापना निर्मिन्ति बुद्ध धर्म व

संघयागु व्यवस्था दयका शान्तिप्रगति व सद्भावना जागृति निम्ति
 अपालं उपायकुशल ज्ञान सिया बिज्यापि दूरदर्शी प्रातःस्मरणीय
 भी पूर्वाचार्यपिन्सं बुद्धजन्मभूमि नेपादेयात त्वगु किसिमं सम्यक्-
 संघ भोजनप्रथा दयका थकल । मेगु अर्थे थुकियात नेपाःया “बुद्ध-
 धर्मउद्धार संघ” धकानं धाय्फु । थुगु सम्यक्धर्मया बन्देज बौद्ध
 मात्रया निम्ति जकमखु, परन्तु मानवमात्रया लागि अज सकलसत्त्व
 प्राणिया कारणे हितसुख शान्ति बिईगु विशुद्ध भुक्तिमार्गया तँपु
 वयनीगु बुद्धशासनया थ्व आदर्शयुक्त प्रथा नं खः ।

बाँलाक बिचाः याना स्वतधाःसा थुगु स्थितिवन्देजया परम्परा
 सम्यक्सम्बुद्ध तथागतपिन्सं आज्ञा जूगु सम्यक्धर्मया शिक्षादीक्षा
 अनुसार आचरणयाईपि सम्यक्संघ, आर्यसंघ, बौद्ध संघपिगु मूल-
 उद्देश्यअनुरूप विधिविधानकयं चलय् जुयावईच्चंगु सम्यक्धर्म खः ।

थुगु महान् धार्मिक, सांस्कृतिक तथा ऐतिहासिक व गौरवमय
 परम्परां जाःगु, विशेषं च्वन्ह्यानाच्चंगु अनुपम आदर्शस्वरूप जुया
 युगयुगनिसें सौभाग्यवस भीगु न्ह्यःने ल्यनाच्चंगु थुगु सम्यक्धर्मया
 गुणवर्णन प्रशंसा न्ह्यावव याःसनं कमहेजक जई । तथापि जि छम्ह
 बौद्धया नातां श्री दीपङ्कर तथागतया प्रति श्रद्धाभक्ति अनुप्रेरित
 जुया सहयोगी कल्याणमित्रपिनि सौजन्यं प्राप्तजूगु व लिसें थःगु
 अल्पबुद्धि चाछि अध्ययन व अनुसन्धान यानागुद्वारा उपलब्ध जूगु
 सामग्रिया आधारे थूगु सम्यक्धर्म-सम्यक्महादान-सम्यक्संघ
 भोजनप्रति अर्थ विशुद्धि महत्त्व सय्के सियकेगु जिज्ञासादुपि श्रद्धालु
 पिगु लागि छुं उपयोगी सिद्ध जुई धइगु हेतुं थ्व बःचाथंगु सफू
 च्वयागु जुल ।

तर, थौंयागु युगे सद्धर्मचेतना कम जुजून वन लिसेलिसें थःगु देशया अस्तित्व गौरवमय संस्कृति, कलात्मक वस्तु एवं पुरातात्विक सम्पत्ति, ऐतिहासिक सामग्री अभिलेख, श्रद्धाभक्तिया स्थान, सजीवमूर्ति व अमूल्य ग्रन्थ एवं तुलांपौ बिलंपौ पौभा व रहस्यमय पूजोपकरण आदि चायकं वा मचायकं तनावन, दुसुनावन मदयावन । उकिंसं थुजागु विषये सःस्यूपि विद्वान्, आचार्य एवं बुढापाकुतनं दुर्लभथें जुवावना च्वन ।

थुजागु ईले सम्यक्धर्म सम्बन्धी उल्लेख जुयाच्चंगु बौद्धजातक कथा अवदान व ऐतिहासिक प्रमाणत तथा वंशावली अनुश्रुतियागु आधार कया थमं सःथें स्यूथें अध्ययन व अनुसन्धान याना संक्षिप्त जकजूसं च्वया थुगु— “इल्हने सम्यक् इतिहास व थ्वया ज्याइवः” नामक पुस्तक जनसमक्ष प्रस्तुत यानागु जुल ।

थुगु सफू हथासं च्वयागु जुया गनं गुगू थासे द्वंगु दतधाःसा विज्ञ पाठकवर्गपिन्सं क्षमा प्रदान याईधैगु आशा दु । लिसें विज्ञ पाठकपिगु सुभा व आलोचना दतधाःसा सहर्ष स्वागत याना च्वना ।

न्हागू ज्यायासानं श्रद्धालु दानपतिपिगु आर्थिक सहयोगविना छुनं ज्या सफल जूईमखुगुलि प्रस्तुत पुस्तक प्रकाशनया लागि जिम्ह सुहृद्मित्र पासा ताजाफः (वर्तमान भूमिखेल) निवासी दान-शीलस अनुरक्तम्ह श्रद्धालु श्री वेखारत्न शाक्यजुं सहर्षस्वीकार याना सम्पूर्ण आर्थिक अभिभार प्रदान याना बिज्यागु जुल । फल-स्वरूप छःपि छिकपिगु ल्हाती तय्गु समर्थ प्राप्त जूगु जुल । थुकिया

लागि वसपोलयात जिगु दुनुगलंनिसे हार्दिक कृतज्ञता ज्ञापन यासैं
साधुवाद धन्यवाद बियाचवनाकि— वसपोलया सदिच्छा सफल
जूगु स्वयेदय्मा ।

थुगु पुस्तक च्वयागु पुण्यानुभावं दिशा भिगु, बखत स्वंगु,
मंगल सुख प्राप्त जुया अन्तस सर्वसत्वप्राणि सम्यक्देवता श्री
दीपंकर तथागतया भुवनस वास लाय्माल जुल । अस्तु ।

ने. सं. १९९२ श्रीपञ्चमी शनिश्चरवार

हेमराज शाक्य

ललितपुर, महादुद्ध

धंता, जयश्रीबिहार

फोन ५-२३२५०

प्रकाशकया थःगु खँ

हनेवहम्ह लिपिविशेषज्ञ भाजु हेमराज शाक्यजुं स्वंगु दशक-
न्हाःनिसें नेपाःयागु बौद्ध संस्कृति, बौद्ध कला, बौद्ध इतिहास एवं
प्राचीन अभिलेख व नेपाल लिपि अन्तर्गत सर्वप्रथम नेपाल लिपि-
संग्रह, नेपाल लिपिविकास तालिका, नेवारीवर्ण परिचय तथा
नेपाल लिपिप्रकाश नामक सफू चवया बिज्यात । थ्वया लिसेंलिमें
नेपाःया सर्वश्रेष्ठ सुप्रसिद्धगु महान् धार्मिक स्थल ज्योतिरूप श्री
स्वयम्भू घर्मधातु वागीश्वरया गवेषणापूर्ण महत्वपूर्ण ‘श्रीस्वयम्भू
महाचैत्य’ नामक सफू करीव ९०० ति पेजसहितगु वृहत्ग्रन्थ
चवया भीगु न्ह्यःने तथा बिज्यात । अथेहे नेपाःया अनेक स्थिति
रीति गुथि मध्ये अतिकं च्वन्हागु सम्यक्महादान गुथियानं
विस्तृत अध्ययन याना सफू चवया बिज्यात । हानं नेपाःया बुद्धमूर्ति
छगू अध्ययन नांगु सफू चवया बुद्धधर्मया सेवायात । थथेहे महत्व-
पूर्णगु बौद्ध संस्कृति विषयनं नेपाल संस्कृतिया मूलुखा धैगु सफू
चवयालि हानं नेपाःया दक्लेसकले नादंगु अतिकं विशालगु सकल
धर्मसम्प्रदायं सम्मानरूपं उतिकं आस्था प्रतिष्ठा तथावईच्च्वम्ह,
तस्सकं लोकं ह्वाम्ह राष्ट्रदेव वृष्टिदेव श्री करुणामय वंगम-

लोकेश्वरया सांस्कृतिक पृष्ठभूमि नामक सफू समेत चवयानं एवं क्रम विभिन्न विषयकया करीव ४० गु ति सफू प्रकाशने हया बिज्याय्धुंकल ।

अज हर्ष व गौरवया विषय थ्व खः कि- थुगु वर्षेनं हानं यल देशया अतिकं च्वन्हागु “इल्हने सम्यक्या इतिहास व थ्वया ज्याइबः” धंगु पुस्तक च्वया प्रकाशन निम्ति जितः सुअवसर प्रदान याना बिज्यागु जुल । थुकिया लागि वसपोलयात जिगु अन्तस्करणं निसें भित्तुना दु । लिसें वसपोलयात आयु, पुण्य, ज्ञान, गुण, कर्म, सिद्धि लाभ जुईमा धका भट्टारिका श्री आर्यतारादेवीयाके प्रार्थना यानाच्चना ।


प्रस्तुत पुस्तक प्रकाशन याय्गु सुअवसर प्राप्त जूगु थ्व जिगु लागि हर्ष व गौरवया विषय खः । आशा दु थथेहे वसपोलयागु महत्वपूर्णगु ग्यसुग्यंगु कृति त हानं हानं प्रकाशन याय्दयेमा । अस्तु

ने. सं. १११२ सिलाथ्व ६ आइतबार

बेखारत्न शाक्य

झम्सिखेल, ललितपुर

फोन ५-२२६७८



हिरण्यवर्ण महाविहारसं च्वंगु प्रसिद्ध प्रज्ञा पारमिता सफु

सम्यक् धर्मया अर्थ

बुद्धं थःगु सम्यक् धर्म, थःगु दार्शनिक बिचार युग-
युगतकं परम्पराकथं चलेजुयाच्चनेमा घइगु सम्यक् संकल्प
याना आर्यसंघ, जिनसंघ, बौद्ध संघया स्थापना याना बुद्ध-
शासनया नी स्वता थकूगु जुल । थुगु संघय् विशेष याना
सम्यक्संबुद्धं आज्ञाजूगु सम्यक्धर्मयात बांलाक प्रतिपादन
याय्फुपिं बुद्धया आन्तरिक भावनायात बुझेयाना काय्फूपिं
छह्यति छह्य प्रतिभादुपिं अध्ययन गाःपिं व्यक्तितहे न्ह्यःने
बढेजूईगु जुयाच्चन । बुद्धयागु बिचारधाराकथं जनसमाज-
पिंगु चित्त बोध याना हितसुख शान्ति बियेगुहे आर्यसंघपिंगु
मुख्यगु ज्या खः ।

श्वहे उद्देश्य ज्वना गथे दयावान्हा वैद्यराज विरामि-
पिंगु छेँ छेँ बना वासः यावनीथेँ जनतापिंगु छेँ छेँ
गांगामे राष्ट्रराष्ट्रय् बना अमिगु हितसुख निम्ति दुद्धधर्मया
प्रचार प्रसार यावना चबनि । श्वहे कारणं याना बुद्धधर्म
विश्वासदुपिं श्रद्धाभक्तिदुपिं जनसमाजं आर्यसंघपिन्त छेँ

छेँ निमन्त्रणा विया बुद्धया सद्धर्माभूत अमरवाणी न्यनेगु
 अनुरोध याई, अध्येषणा याई । थथे जुया निमित्त आर्य-
 संघपिणु ज्ञानगुण लुमंका छेँ छेँ सःता बुद्धयागु
 उपदेश न्यना वसपोलपिन्त यथाश्रद्धा भोजन दानधर्म
 याकेगु याना वईच्चन । थुजागु प्रकारं बुद्धधर्मप्रति गौरव
 तथा आर्यसंघपिन्त निमन्त्रणा बिईगु चलन बुद्धया महा-
 परिनिर्वाण जुईधुंकानं स्वसः प्यसःदें तकनं भिक्षुपिनि छगू
 सामान्य दिनचर्या थें चले जुयाच्चन ।

थुजागु थव बुद्धधर्मया परम्परा सम्यक्धर्म स्थिति
 परन्तुतकनं चिरस्थायी जुईमा धइगु शुद्ध हृदयनं बुद्धधर्म
 प्रख्यान्त याय्गुलि समुन्नति याय्गु कोक्षिस यानाच्चपि
 आपालं उपायकुशल ज्ञान सिया बिज्यापिं झी श्रद्धेय
 पूर्वाचार्यपिन्सं थव स्थिति वन्देज यातकि-

आर्यसंघपिणु कृतज्ञता संज्ञेयाना केवल थद्धाभोजन
 याकेगु मात्र धयां उलि लोकजनपि आकर्षित जुईमखु,
 गुलि सम्यक्भोजन धाय्बले महत्त्व दई, प्रभावित जुई
 व्यापक एवं परिशुद्ध जुई, बुद्धधर्मयागु सारा विशुद्ध
 संस्कृति थुकी सन्निहित जुई, बुद्धया महान् उपलब्धि
 सम्यक्संबोधिज्ञानयागु आभास थुकी झल्के जुयाच्चनी ।

अतएव थवहे विशुद्ध आदर्शयात अपनय याना थव
 परम्परा कायम याना वईच्चंगु खने दु-

वसपोल सम्यक्संबुद्धं आज्ञा जुयाबिज्यागु आदिमध्य
अन्तेसं कल्याणगु, परिशुद्धगु, परिपूर्णगु सम्यक्धर्मयात
पालन याईपि सम्यक्संघ आर्यसंघपिन्त आदर-सत्कार
याना निमन्त्रणा याना भोजन याकेगुयात सम्यक्-भोजन
सम्यक्दान, सम्यक्धर्म धका नाम प्रसिद्ध यानाव्यूग जुल ।

साधारणतया सम्यक् शब्दया अर्थ खः, ठिक मनासिव भिन्नकं धईगु मात्र बुझे जुई । परन्तु थुकी बौद्ध दृष्टि बौद्ध संस्कृतिकथं बौद्ध आचार्यपिगु धापु अनुसार बिचाः याय्-बले सम्यक् शब्दया अर्थ उलि धयां वास्तविक तात्पर्य बुझेयाय् फईमखु ।

बुद्धया सिद्धान्त अनुसार— यथार्थरूपं सुखशान्तियागु अभिलाषा याईपि न्ह्याम्हसिनं न्ह्यागु खँय्नं अत्यधिक तल्लीन जुईगु अथवा उकी पूर्णतया वंरागी जुईगुलीनं अहित मानेयानातःगु दु । अर्थात् न्ह्याम्हसिगु लागि अपो जुईक नय्गु अथवा छुंहे नहेमनसे चवनेगु थ्व वईगु लागि हितकर मजु । थःत फाईदा जुईक ठिकमात्राय् सेवन याय्गुहे सन्निहित जुईगु खः । अर्कि ठिकतरिकां सेवन याय्गु लँपुयात कयाहे 'सम्यक्' शब्द प्रयोग याना तईतःगु जुल । अर्कि बौद्ध दर्शनया सिद्धान्तयात विश्वास याईपि, श्रद्धा तईपि सुनानं बौद्ध शास्त्र व बौद्ध संस्कृतिया ज्याखंय् प्रयोग जुयाच्चंगु 'सम्यक् शब्द'यात बुद्धयागु मध्यम मार्ग,

माध्यमिक दर्शन, नसंसार ननिर्वाण धइगु विशुद्ध आदर्श-
यात संकेत याईगु तत्त्वज्ञानया रूपे संज्ञेयाय्गु आवश्यक
जूवई । तर थन बुद्धया मध्यम मार्गयागु महत्व धया-
 च्चनेमाःगु आवश्यक मदु । छायासा बुद्धयागु प्रतिष्ठा
 गौरव एव विशेषता व अस्तित्व थुकी हे दु ।

थ्वहे आदर्श अनुसारं प्रातःस्मरणीय श्रद्धेय स्त्री पूर्वा-
 चार्यपिसं थथे दीपङ्कुर तथागत बुद्ध बोधिसत्त्वपि बिज्याका
 आर्यसंघपिन्त उचित सन्मानपूर्वक स्वागत सत्कार याय्गु
 संघभोजनयात 'सम्यक्' धका प्रख्यान्त यानाव्यूगुलि याना
 समस्त बौद्ध धर्मावलम्बिपिन्सनं थुकी श्रद्धाभक्तिपूर्वक
 श्रिवादन याःगु जुल ।

अज, थुगु 'सम्यक्-धर्म'या विषय कया बोधिसत्त्व-भूमि
 नामक ग्रन्थय् थथे निर्देशन याना तईतःगु दु कि-

बोधिसत्त्वानां बुद्धानाञ्च भगवतां धर्मनैरात्म्यवेशाय प्रविष्टेन
 सुविशुद्धेन च सर्वधर्माणां निरभिलाष्य स्वभावतामारभ्य
 प्रज्ञप्तिवाद स्वभाव निर्विकल्पज्ञेय समेन ज्ञानेन यो गोचर
 विषयः सासो परमा तथता निरुत्तरा ज्ञेयपर्यन्तगता यस्या
 सर्वं 'समो धर्म' प्रविचया निवर्त्तते नाभिवर्त्तन्ते ।

तस्मिंश्च तत्त्वे बुद्धानां भगवतां सुविशुद्धज्ञानं वेदितव्यं ।
 बोधिसत्त्वानां पुनः शिक्षामार्गं प्रभावितं तच्चज्ञानं वेदितव्यं ।

गुलिं विद्वान्पिंसं सम्यक्था अर्थं अथेनं चवःगु दु-
सत्य व धम संमिथण जुया सम्यक्धर्म जुगू । गुगुजा दुःख
पुकिगु, पुथ्यवधय् याईगु बोधिज्ञानया लं वयना परम-
शान्तगु निर्वाण यङ्किगु, राग द्वेष लोभादि मारगुण मदुगु,
मारचित्त मदय्किगु सम्यक्धर्म खः ।

सम्यक् दानधय् गुवर्म सम्यक् उद्योग याना मुंकागु
धनद्रव्यद्वारा स्वार्थं त्यग याना परोपकार यायगु, सकसितं
कल्याण जुईगु दुःख फुईगु भिङ्गु ज्या खँ व चित्तं उपायं
दान बिईगु खः । गुगू दान धर्मया कारणय्के परप्राणि-
यात घातक याना स्मृति विभ्रम जुईगु मदचमांस पर्यन्त
चलेयाई उगू दान धर्म निष्फल जुई । लिसें उगु दानयात
बुद्ध बोधिसत्वपिंसं दान धका ग्रहण याना काईमखु । बरु
ब्रह्मादि दिग्पाल लोकपाल धर्मपालपिनं नायं कोप जुई
धका बुध्दं आज्ञा याना बिज्यागु दु ।

हानं सम्यक्दान ग्रहणयाईपिन्सनं मुनीश्वर तथागत-
पिगु गुगुगोरवप्रति श्रद्धाभक्ति तथा शुद्धचित्त याना भति-
चाहे लोभ राग द्वेष मतसे प्राणियगु उपरे बोधिचित्त
उत्पत्ति याना लिसें श्रद्धालु दानपतिप्रति दुनुगलनिसें शुभ-
चिन्तक जुया आशिर्वाद बिया प्रसन्नपूर्वक दानग्रहण याना
काईपि जुयमा ।

सम्यक् न्याईकिह्य दानपतिनं जुलसां प्रतिस्पर्धाया

भाव तया तमासा वयनेगु धन श्रीसम्पत्तिया फूति वयनेगु
स्वइतनं अपमान याय्गु, थःगुजक जिद्दी याना प्रमादी जुया
अष्टलोक धर्मयागु इच्छा याना याय्गु मखुकि-

थःगु दुनुगलंनिसें उत्तमगु श्रद्धानिश्चय तया गुरु त्रिरत्न
बुद्धबोधिसत्त्वपिं गुण गौरव अनुस्मरण याना सर्वसत्त्व-
प्रणिपि याकनं दुःखसागरं मुक्त जुया सम्बोधि-ज्ञान प्राप्त
याईपि जुईमा धका बोधिप्रणिधिचित्त उत्पत्ति याना
सम्यक्चक्रया विधिविधान अनुसारं सम्यक्पूजा, सम्यक्दान,
सम्यक्भोजन, सम्यक्सम्मेलन याके धइगु मत्ती तया
सम्यक्चया यायेमा ।

थुगुहे प्रकारं सम्यक्समारोहस उपस्थित जुईपि उपा-
सिका दशक एवं श्रोतागर्णपिंसनं थुगु सम्यक्धर्म जुयाचवंगु
खनालि दर्शन, स्पर्शन, चिन्तन मनन याबेखंगुलि अनुमोदन
याय्गु उत्तम भाःपियेमा ।

एव सम्यक् शब्दया अर्थ विशुद्धि बौद्ध दृष्टिकोणं थःगुहे
परम्पराकथं च्यागु किसिमं थथे मान्य याना वईचवंगु
खने दु-

- १) भिन्नक सम्यक् पूजां करोम्येव तथागतानाम्
- २) परिपूर्णगु सम्यक्ज्ञानभास्कराय
- ३) परिशुद्धगु सम्यक्भोजनं प्रविशतु
- ४) तस्सकं लोगु शासनमिदं स्थापयामास सम्यक्

- ५) समभावयुक्तगुं हीनोच्चसमसेवनार्थं सम्यक्
- ६) सकलं दुःश्यागु सम्यक्धर्मं प्रविशतु
- ७) सकलभनं येनाच्चंगुं ज्योतिं सम्यक् संप्रकाशयन्ति
- ८) यथार्थंगु मद्गुं सम्यक्चर्यां करोमि

थुगु सम्यक्धर्मसं सम्यक्विधानचक्र अनुसारं याता
वईच्चंगु मुह्यमुख्यगु ज्या थथे खः-

- १) सम्यक्देवता दीपङ्कुरतथागतपिन्त पूजा
- २) आर्यसंघपिन्त दान व भोजन
- ३) यच्चिस्वने धर्मपाल हारतो पूजा
- ४) लोकपालस्वरूप दिग्पताका ववयके
- ५) क्षेत्रपाल स्वरूपं नागराज आवाहन
- ६) जुजुयात स्वागतार्थं इन्द्रकलशं लःलहाय्गु
- ७) दानपतियात सन्मानार्थं पूर्णकलशं लःलहाय्गु
- ८) लोकजनपिन्त- थुगु सम्यक्धर्म यातागुयार्के प्राप्त

कुशल मूल पुण्यानुभावं देश नरेश सकल प्राणियात
सुखशान्तिया लागि सम्यक्परीणामना धर्मदान याय्गु
ज्या जुई ।

नेपाःया बौद्ध संस्कृति अध्ययन व अनुसन्धान याता
स्वयंबले थन च्यागु किसिमं संघभोजन चलेजुया वईच्चंगु
खने दु-

- १) मूल विहारया संघभोजन

- २) मूल विहार आतर्गत थःथःगु कुटुम्ब माश्रया संघभोजन
- ३) शिष्यागु विहारया संघ सम्मिलित जुयानं संघभोजन
- ४) फुक्क बहो मुना छगू संघभोजन
- ५) बहोय नं कुटुम्ब लिनाजक नं संघभोजन
- ६) बहो व विहार समन्वय जुया नं संघभोजन
- ७) थःथःगु देया अलग अलग जुया नं संघभोजन
- ८) स्वंगु देया नं संघपि एकत्रित जुया नं संघभोजन

सम्यक्दान महोत्सवस मुख्य निम्न प्रकारं सम्यक्दा
सांकि छने दयाच्चनि—

- १) दर्शनीय अनुपम बौद्धकला प्रदर्शनी
- २) पिण्डपात्रशाला दानोपकरण वस्तुतय्गु सजावत प्रदर्शनी
- ३) आर्यसंघपिगु भेला जुयाच्चनि
- ४) श्रद्धालु दानपतिपिगु त्यागमय जीवन
- ५) दानपतिया थःथिति व श्रद्धालु भक्तजनपिगु श्रद्धाया
तपं वयाच्चनि
- ६) गौरवमय दानगाथा व पंचताल तूर्यताडावचरया मधुर
तपं सुन्दरध्वनि गुञ्जायस जुयाच्चनि
- ७) सम्यक् विधानचक्रया ज्याइवकथं विधिविधान जुयाच्चनि
- ८) धर्म व संस्कृतिप्रेमि दर्शक जनपि उल्लास उमङ्ग प्रफु-
ल्लित जुया दर्शन स्पर्शन एवं चिन्तन यांना सम्यक्
धर्मयात प्रशंसा यांना च्वनि ।

६) उक्तिसं राष्ट्रनायक श्री ५ महाराजाधिराज सरकार
सम्यक्मण्डप खतस सुवर्णसिंहासनय् राजजुया सम्यक्
धर्मयागु नेतृत्व याना श्रीशोभाबृद्धि यानाचवनि ।

थुगु सम्यक् धर्मस आर्य अष्टांगिक मार्ग स्वरूपं थःगुहे
किसिमं भावना पिःज्वयाच्वंगु खनेदया चवनि—

- १) सम्यक्दृष्टि... दीपङ्कुर तथागत प्रमुख सम्यक् देवतापि
दर्शन याय्गु
- २) सम्यक्संकल्प... सम्यक्धर्म स्वयागु, न्यनागु, थियागु,
लुमंकागुलि शुद्ध संकल्प धर्मचित्त पुण्यचित्त उत्पन्न जुई
- ३) सम्यक्वाक्... स्तोत्र आदि दानगाथा व्वनाच्वंगु
- ४) सम्यक् कर्म... जिनक्षत्र व आर्यसंघपिन्त पूजा यानागु,
दानबियागु, भोजन याकागु, अनुपम राष्ट्रया संस्कृति
संरक्षण यानागु, आदरतयागु ज्या जुयाच्वंगु
- ५) सम्यक् आजीव... थुजागु विशुद्धगु पवित्रगु सम्यक्
धर्मयाके जीवन हनाच्वंगु
- ६) सम्यक् व्यायाम... थुगु ज्याय् अलसि दिवक तोता
वीर्योत्साह पिकया दत्तचित्त जुयाच्वंगु
- ७) सम्यक् स्मृति... सम्यक्चक्रविधानया धलपौः व पूजा-
विधिकथं मद्धं होस तथा सम्यक्या कार्यक्रम न्ह्याका
च्वंगु
- ८) सम्यक् समाधि... थुगु सम्यक् धर्म यानागुद्वारा ज्ञान-

सत्त्व तथागतपिं, समयसत्त्व प्राणिपिं समएकत्वं खनेगु,
समाधिसत्त्वस सुप्रतिष्ठित जुयाच्चवनेगु वास्तविक सम्यक्
धर्म अवबोध याय्गु ।

थुगु सम्यक् धर्मस च्यागु प्रकारया मुख्य कार्यविधि
व्यनातःगु खने दु—

- १) तथागतपिं गुणानुस्मरणया लागि पूजा
- २) आत्मभाव त्यागया निमित्त दानप्रदान
- ३) आर्यसंघपिं सत्कारया लागि दानभोजन
- ४) शान्ति सुरक्षाया कारणं बौद्धसङ्घायन
- ५) चित्तवृत्ति सुधारया हेतुं सद्धर्मचर्या
- ६) देशगौरव निमित्त राजाउपस्थिति व अनुपमकला प्रदर्शन
- ७) दर्शकवृन्दया लागि सद्धर्मयात्रा
- ८) दानपतिया श्रद्धाङ्कुरद्वारा बिकसित सम्यक्महोत्सव

सम्यक् न्याइकिह्य दानपतिजुं सम्यक्या परस्पराकथं
गुं कितिमया कीर्ति दय्का वईच्चवंगु खने दु—

- १) बुद्धया कायिक शासनया दिव्यभावनाया प्रतीकरूपे
श्री दीपङ्कुर तथागतया सुवर्णमय कलात्मक भव्यमूर्ति ।
- २) बुद्धया वाचिक शासनया शुभप्रतीककथं सद्धर्म ग्रन्थ
उच्चकोटि बौद्धदर्शनया सफू प्रज्ञापारमितादि ग्रन्थ ।
- ३) बुद्धया चैतसिक शासनया दिव्यप्रतीक सर्वसुगत हृदय
पंचबुद्धात्मक धर्मधातु चैत्य ।

- ४) बुद्धबोधिसत्त्वपिंसं यानावंगु दानदान, महादान, सम्यक् दानया गौरवगाथाया संस्मरण स्वरूप दानपारमिता-लीला तुनापौ, बिलंपौ अथवा पौवाहा ।
- ५) थुगु महान्धर्म सम्यक्धर्म विशुद्धधर्म जुयावंगुया संज्ञना कथं दिव्यसन्देश न्यंकूगु दु धैगु भावनाकथं घण्टाघोषणया रूपे घण्ट ।
- ६) पूर्ववर्ति बोधिसत्त्वपिंसं याना थकूगु दानपारमिताया गुण धर्म प्रकाश याय्गुलि अनुशरण जुयाच्चव्हंश श्रद्धालु दानपतिया छेँ लौकिक लोकोत्तर देवतापिंसं वासयाई धइगु धारणाकथं अनेक देवतापिगु चित्र चवकी ।
- ७) दानपतिजुं गन गुगूथासे सम्यक् न्याय्कावन, अन उगु थासे सालमिति अंकित याना मण्डपाः छपाः स्थापना याई अथवा देवस्थले, विहारे तामापत्र ताके बिई ।
- ८) सम्यक् भोजन सिधःगु उपलक्षस श्री स्वयम्भूस्थान अथवा थःगु विहारया क्वाचपालदेवतायात पिण्डपात्र, पत्ता, किंकिपा हृदयपवः मुकूत आदि थःगु श्रद्धानुसार द्रव्यलपेगु याई ।
- ९) सम्यक्, नरां, पञ्जरां न्यायकुसां निसें प्रतिवर्ष श्री दीपंकर तथागत लुमंका आर्यसंघयात परन्तु वा छत्तु जाकि छत्तु, छो छत्तु जकहे जूसां दान बिया चवने फय्मा धइगु त्यागचित्तं जुगादि पञ्जरां खुन्हूया निम्ति छूँनछुं दानदत्त गुथि तया थकी ।

सम्यक्भोजन सम्बन्धी विभिन्न अभिलेख अध्ययनकथं खने दुगु सध्यकथा विविध नाम अङ्कित जुयाच्चंगु खने हु ।
प्रसंगवस उदाहरणया लागि नांत थन प्रस्तुत यानाचवना-

क्र.सं.	सम्यक्संघभोजनया नां	सम्बत्	आधार अभिलेख	प्राप्तिस्थान
१)		वृषदेव	चाःवही धनद्विवाहा शिलालेख	लिच्छविकालका अभिलेख संख्या १
२)	भिक्षु भोज्य सन्नकृतं	शिवदेव	गोपाल वंशावली	राष्ट्रिय अभिलेखालय
३)	सम्यक्	ने.सं. १३५	अष्टमाहसिका प्रज्ञापारमिता	क्याम्ब्रिज युनिभर्सिटी लाईब्रेरी
४)	महादिशा संघ भोज्य	" ५९९	सम्यक्निमन्त्रणा हरितालपत्र	श्री हेमराज शाक्यया थःगु संग्रह
५)	श्रीश्रीआर्यसंघस्त पात्रापुरण चटनजापो दोहोरपं	" ६२४	ताम्रपत्र	विश्वकर्मा विहार, येँ
६)	आर्यसंघेभ्यो भक्तदानं	" ६२९	ताम्रपत्र	निम्नि बाहा, येँ
७)	श्रीश्रीआर्यसंघस्त पात्रपुरण चटन जापो दोहोरपं	" ६३४	ताम्रपत्र	श्रीमज्जुश्री नवविहार, येँ
८)	सर्वसंघपिण्डपात्र उपढोषित	" ६४५	पिण्डपात्र लेख	श्री हिरण्यवर्ण महाविहार, यल
९)	आर्यसंघ पिण्डपात्रदान "	" ६५४	पिण्डपात्र लेख	" "

१०)	दिशासंघ महाभोज्य	ने.सं. ६६७	शिलापत्र	पुष्पावाहाल, ये
११)	सर्वसंग (घ) पिण्डपात्र दक्षिणा दोहरपा	" ६७०	पिण्डपात्र लेख	श्री हिरण्यवर्ण महाविहार, यल
१२)	तथागतत्वं चतुस्रजा दोहरपा	" ६८७	तालपत्र	केल पञ्जादौ गुथिया
१३)	महादिशादि संघ भोज्य	" ६९६	ताम्रपत्र	थेमि देगुबाहा
१४)	दिशादि संघ भोज्य	" ७१४	शिलापत्र	इतुंबाहा, ये
१५)	रत्नत्रय दिशासंघ	" ७३१	ताम्रपत्र	श्री मञ्जुश्री नवविहार, ये
१६)	श्री दीपंकर भट्टारिकात्वं विज्या चकु	" ७४५	पिण्डपात्र लेख	मसुननि आगं छेया, यल
१७)	दीपंकर प्रमुख सर्वसंघ भोज्य	" ७५०	शिलापत्र	दुरुख्यः बाहा वाः दे
१८)	दिशासंघ भोज्य	" ७५७	ताम्रपत्र	श्री हिरण्यवर्ण महाविहार, यल
१९)	संघ भोजन	" ७७०	शिलापत्र	स्वयम्भू भुइखेल
२०)	आर्यसंघस्त पिण्डपात्र दोहरपा	" ७७५	ग्रन्थपुष्पिका	इततुंछेया, ये
२१)	संघ भोजन	" ७७७	"	गुणाकर महाविहार, ये
२२)	पिण्डपात्रदान	" ७८७	सिंहासन लेख	यल लायकू
२३)	पात्रपुरणदान	" ८१७	शिलापत्र	योतलिवि, यल

२४)	सम्यक् विजयाय च संघ- भोज्य दान	ने.सं. ८३९	ताम्रपत्र	हिरण्यवर्णं मह विहार, यल
२५)	सम्यक् भोजन	" ८५१	कोखापुत्रु	तुं छं सम्यक्यःया, ये
२६)	सम्यक्गुथी	" ९०९	कागजपत्र	छंभदिल निस्तालपत्र इतुंबाहा, ये
२७)	आर्यसंघ दक्कस्तं पिण्डपात्र दान	" ९१८	पौवाहा लेख	डे त
२८)	समेकगुठी	" ९२४	कागजपत्र	गुठिजांच कचहरीपत्र १८६१ इतुंवा
२९)	समेकगुठी	" ९२८	कागजपत्र	समेकगुथि वन्धेजपत्र १८६५ हा
३०)	सम्यक्संघ भोज्य सम्यक्चक्र विधान	" ९४५	कागजपत्र	संस्कृतसन्देश वर्ष १ अंक ७
३१)	आर्यसंघ सम्यक्गुठी	" १०१६	कागजपत्र	समेकगुथिधलः, वटुबाहा ये
३२)	मुविशुद्ध आर्यसम्यक् भोज- नार्पण	" १०८८	दानपत्र	यटखाबाहा, ये
३३)	सम्यक् धर्म	" १०९९	"	टेबाहाल, ये



हिरण्यवर्णं महाविहारसं च्वंगु क्वाभाजु

इल्हने सम्यक्या संक्षिप्त परिचय

लिच्छविशासन अन्त जुईधुंका छुं शताब्दी लिपा
मल्लकालयाः ह्यः गुबले ललितपुर महानगरे थकुरीवंशी
जुजुपिन्सं शासन चलेयाना चवन । उबले निसैं यें, यल व
खपदेशस थाय्थासे बुद्धधर्मप्रति श्रद्धा भाक्त तथा बिहार
निर्माण याना आपालं गुठी दयेका व्यवस्था मिलेयाना
वन । गुलि थकुरीवंशी जुजुपिन्सं अनेक धर्मकीर्ति स्थापना
याना रीतिस्थिति दयेकावन, उलिमध्ये छगु यलया सुप्रसिद्ध
श्री हिरण्यवर्ण महाविहार (क्वाठ भट्ट विहार) क्वाःबाहा
झिनिगू शताब्दीपाखे जुजु श्री भास्कर देवजुं विधिपूर्वक
दयेका थकल । थौं थुगु विहार यल छगूली मात्र नां जाया-
चवंगु मखु, नेपाल अधिराज्य सकभनं अज अन्तरराष्ट्र
थ्यंकनं थुकियागु महत्त्व व प्रशंसा प्रचार प्रसार जुया
वनाचवंगु दु । धात्थें धायेमाल धासा थौंयागु इतिहासे थुगु
विहारथें सुन्दर, समृद्धगु एवं प्रसिद्धि दईचवंगु नेपाःमि
बौद्धतय् थःगुहे तालगु विशेष नियम (थितिरोति) पालन
यायेमागु बाहा, बही व देग मेगु निगू दईमखु धासां ज्यू ।

गुम्ह खः भास्करदेव जुजुया परम्परागत सन्तानपिन्सं
गुलिनं दानदत्त गुठी तयाथकल, उलिमध्वेनं छगू थुजागु
गुठी दु- दैय्दसं मार्गशुक्ल पूर्णिमा यःमधिपूणीखुन्ह दश-
पारमिता बौद्ध देवतापिन्त निमन्त्रणा याना लिख्य चायेका
स्वागत्सकारपूर्वक क्षीर-भोजन याकीगु जुयाच्चन ।

छन्ह थुमि सन्तान छम्हसिनं खपदेशया थकुरीया
म्ह्याय्मचा छम्ह ब्याहा याना हल । थुगू गुठी न्यायकू-
खुन्ह न्हम्ह सम्धीयातनं सतके छोट, बल, माःगु शिष्टाचार
पूर्वक खँल्हाबल्हा जुल, नके त्वंकेयात बिदाबाजी बिया
लिछ्वत । तर उगु गुठीस जुईगु मुछ्यगु 'रहस्यकृया' छगू
उम्ह सम्धीं स्वयेमखंगुलि याना वंत गाकं असन्तोषथे
जूगु जुया चवन । थुगू गुठीयागु विशेष थितिरिति व
प्रसिद्धि खना तस्सकं प्रभावितनं जूगु जुल । थ्वहे विषयकया
जिचाभाजु थःथाय् नखत्या ब्वंबले अनेक प्रकार शंकायाना
कुत्तुकुला न्यन, लिसें दशपारमिता बौद्ध देवतापिन्त क्षीर-
भोजन यावयगु गुठीया विधिबिधान रहस्यकृया छक जितनं
दर्शन ब्यू धका छलकपट याना न्यन । ससःअबुयागु
खँ न्यना जिचाभाजु सतके छ्वत सरासर बल, उगू गुठी-
यागु विशेष महत्त्व खना स्वमफया च्वंम्ह सभिमतीतया
च्वंम्ह ससःअबु दशपारमिता छत्रकू आजुपिन्त क्षीर
भोजनस सुनानं मखंक गुप्त रूपं विष प्रदान यानाबिल ।

दशभूमोश्वर ज्ञाने थ्यं पि शुद्धचित्त जुयाच्चं पि, परचित्त
 ज्ञानदु पि दशपारमिता बौद्ध देवतापिसं उगु भोजने विष
 प्रदान यागु लक्षण सीका विष शोधन जुईगु 'विष प्रमोचनी'
 नाम धारणी मन्त्र परलपा छुं मखुथें याना भोजन भपा
 बिज्यात । थुगू धारणीया प्रभावं आर्य जिन संघ दश
 स्थवीर आजुपिन्त छुं विष लगेमजुल । अखवतं थुगू पाप
 चित्त उत्पत्तियाम्ह दुष्ट खपमि थकुरी सम्धीयात विषं
 दाह जया प्राणान्त सम्मनं जुल । थुजागु आपद् बिपत्
 अवस्थाय् अनेक वैद्य वयनास्वतनं छुं उपायं मथ्यूसेलि गथे
 जुल छु जुल धका ज्योतिषीयात दयना स्वःगु बेलस तधंम्ह
 देवताय.गु दोष लगेजुगु दई धका धयाहसेलि थःगु छे
 बिज्याना च्वं पि दशपारमिता आजुपिन्के बिन्तिभाव या.गु
 बेलस थुमिसं उम्ह पातकीया उपरे करुणा तया आज्ञा
 प्रसन्न जुल—

भो थकुरी ! आ थ्व मर्त्यमण्डले पाप बढे जुईन, छे
 ससःअबुं अकुशल मतीतया बिना अपराधं महान् पाप-
 कर्म यात, उकिं थःगु पापचित्तं थःतहे दुःख जुल “संसारे
 गुम्हेसिनं गुगु कर्म याई उम्हेसिनं उजागुहे अवश्यं बिपाक
 भोग याई” धका उपदेश बियालि लिसेलिसे लंछजपा व
 उम्ह पातकीया म्ह्य लखं हाहायाना बिल । वसपोल आर्य
 संघ दशपारमिता आजुपिगु शुद्धचित्त बोधिचित्तयागु

अधिष्ठानया बलं तुरन्त विषं दाहजुगु संकष्ट दुःख सररं
 लायावना, आरोग्यसुख प्राप्त जुया न्हापा गथे खः अथेसंतुं
 आनन्द जुल । अले उम्ह पापात्मा ब्यक्ति सचेष्ट जुसेलि
 दुनुगलंनिसें प्रायश्चित्त स्वरूप विनम्रपूर्वक क्षमा पवन कि-
 आवंलि थुजागु पापचिन्तना यायेमखुत, स्वैतं दुःख बिये-
 मखुत धका दृढसंकल्प यांना धन्य ! धन्य !! आर्य बौद्ध
 संघ दशपारमिता आजुपि धकं प्रशंसा यांना थःगु छे
 लिहांवन ।

थनंलि दशपारमिता बौद्ध देवतापिन्सं आज्ञा जुल-
 भो यल न्होलविहारया थकूजु ! आवंलि जिपि थुगू लोकस
 हानंहानं वया चवने फईमखु । अथेजुसां छिमिसं सीकि
 थुपि दशस्थवीर आजुपिगु शरीरे जिपि दुपिना वये, परन्तु
 प्रत्यक्षरूपं वयेमखु । अकिं थुमित दशपारमिता बौद्ध देवता
 प्रतिनिधि स्वरूपं श्रद्धाभक्ति यायेगु स्व, मानु जिमितहे
 निमन्त्रणा यांना भावभक्ति यांनागु समानं निश्चयनं पुण्य-
 फल प्राप्त जुया अन्तस दिव्यसुख लाई धका धया तभः
 बिया अन्तर्धान जुयावन ।

थुगू अपूर्व घटनाया कारणं थौतकनं बौद्ध विहारया
 दश स्थवीर चक्रेश्वर छत्रंकू आजुपिन्त दशभूमि प्रतिष्ठित
 दशपारमिता आजु धका विश्वासं न्हापांनिसें आदर सत्कार
 यांना वईच्चंगू जुल । थ्वहे दशपारमिता निर्मन्त्रणा गुठी
 थुमि सन्तानपिन्सं मर्यादापूर्वक सन्मान यांना वईच्चन ।

गुलिछि समय लिपा (अनुमानित झिप्यंगू शदीपाखे)
 थुमि थकुरीवंशे दरिद्र व समृद्धिया कारण जुया च्वंम्ह
 भलीभराद धयाम्ह थकूजुया पालय् तस्सकं अवस्था खराब
 जुया कङ्गाल जुगु जुल । आपालं दुःख स्युस्युं यानायानागु
 लजगार यानानं नयेमखनालि सप्पा मुनेगु ज्यायाना तकनं
 नयेमाल । श्वहे सप्पा मालामाला हया सुनानं मखंक
 धुकूती स्वथना तल । दरिद्रताया कारणयाना थःम्ह कला-
 यात तकनं थःगु धुकूया खं कनेमछागुलि याना सप्पा
 स्वथना तःगु खनी धका बहुत घन्दापीर कया तालंसमेत
 ग्वया ताचा सुचुका जुईगु जुया च्वन । छन्हूजा म्वःरुये
 धका वाग्मती वंबले हथायचाया ताचा सुचुका वनेलोमन ।
 उबले व ताचा खँका कलाम्हसिया मती च्वनकि- जि
 प्रभु स्वामिजुं न्ह्यागु ज्याखें विश्वासपूर्वक छगुछगूदतले
 जित खँकना तई थुगू ताचा छपु जक जित छाये पत्यार
 मयागु जुई धैगु मती तया उगू न्ह्याःनेस च्वंगु ताचा खँका
 कया धुकूती ताः खना स्वबले भातम्हेसिया स्वथना तगु
 सप्पा व्याकं लुं जुया च्वंगु खन । भातम्हसिनं ब्वबिई धका
 ग्याना काचाकाचां तालंग्वया गनच्वंगु ताचा खः अनसंतुं
 तयाबिल । भचा जायेका वाग्मती ज्ञाया च्वंम्ह भातम्ह
 लिथ्यनेवं कलाम्हसिनं तस्सकं लय्लय्ताया शुभ समाचार
 त्यंकल ।

भो प्रभुस्वामि ! अपराध क्षमा याना दिसँ, थौं छिसं
 धुकूया ताचा त्वःता थकल, जित गुबलें धुकूपिकु मक्यंगु
 जुया थौं संयोगं मौका लाका धुकूया ताःखना खापा चायेका
 दर्शन जक यानागु खः, तर दुहाँवन गुजा मदु । परन्तु छिसं
 गथे तयातःगु खः अथेसंतुं जुयाच्चंगु दु । उकी जि लोभ
 याना छुं हीनामिना यानागु मदु । छिगु धन श्रीसम्पत्ति
 खना जि तस्सकं प्रसन्न जुया च्वना, थुलिमछि धनश्रीसम्पत्ति
 दयानं शीसं अपालं दुःखसिया च्वना थुकोयागु मतलब छु ?
 धका न्यन । थ्व खं न्यना भातम्ह तस्सकं अद्भुत जुया
 धुकूया खापा चायेका स्वबले थम्हं कष्टनया मुंका तयगु
 सप्पा स्वप्नान्तरे खतीगुथें ब्याक्क सप्पा सुवर्णमय जुयाच्चंगु
 खना उम्ह थकुरीजुं तस्सकं आश्चर्य जुल । उलि थुलि मदेक
 लय्ताया थम्ह श्रीमती थकुरिनीयात धाल-

भो प्रियत्तमा ! शी जि निम्हतीपुयागु अहोभाग्यं
 परमेश्वर प्रसन्न जुया विपुल श्रीसम्पत्ति ऐश्वर्यलक्ष्मी प्राप्त
 जुल धका हर्ष अनुमोदन यासे थःगु जीवनया इतिहास खं
 न्यंकाच्चन ।

थथे निम्हतीपुया परस्पर सुख दुःखयागु खँल्हाना
 शान्तबना प्राप्त जुसेलि अत्यन्त हर्ष प्रकट यासे आनन्दरस
 नं सल्हासाहुति जुल कि- शीसं न्हापा पाप यानागु फलं
 शीपि असंख्य दरिद्र जुया तच्चःगु दुःखसिया च्वने धुन ।

आ हाकनं शीसं छु धर्मकर्म याना वयागुलिं झीत महान्
 शुभसंयोगवस समृद्धिमुखया कारणं तधंगु श्रीसम्पत्ति लाभ
 जुज । थुगु श्रीसम्पत्ति सार जुईगु, थःगु परिश्रम सफल
 जुईगु, आजु अबुपिंगु कीर्ति परन्तु स्थिर जुईगु सत्गुरु
 कल्याणमित्रपिनि वचन शिरोपर जुईगु एवं परत्रयात सामो
 दइगु छुं छगू तधंगु पवित्रगु धर्मकीर्ति छगू स्थापना याना
 वनेमाल धैगु विषय कया निम्हेसिया छलफल जुयाचवन ।
 थुजागु सुदुर्लभ मनुष्यजीवन प्राप्त जुबले निश्चयनं धर्म
 छगुजा यायेमा, तर छु गजागु धर्मयाये ? धैगु वारे आपालं
 खँ जुज । कलाम्हेसिनं इनापयात— संसारे बिष्णुधर्म पालन
 यायेना उकीया लागीं झीगु श्रीसम्पत्ति खर्च यायेदुसा बहुत
 उत्तम धका जिद्दी यानाचवन । थ्व खँ न्यना भातम्हेसिनं
 धाल— अथेमखु न्हापानिसें झी पुर्खापिन्सं पालन याना वई-
 च्वंगु बुद्धधर्म सेवा यायेगु धका उत्तम । तर कलाम्हेसिनं
 धासा थःगुजक जिद्दी याना चवन । थ्व खँ न्यना, हानं
 मिजम्हेसिनं बिचा यात, धर्मया सिद्धान्ते त्वापु जुईन
 धैगु आशय थुईका न्याययुक्ति संगतगु छगु तर्क पेस यातकि
 थुगु ईलय् छजि निम्हेसिया थवंथः धर्मया नामे वाद
 विवाद यायेगु ठीक मजू । छँ धागु ज हनं खँ जि न्यनीमखु,
 जि धयागुनं छन्त यैमखुत धासैलि निम्हेसियां मने सिचुक
 याउँक बौद्ध व वैष्णव धर्मयागु— 'सत्य धर्म गुण' परीक्षा

याना जक झीगु धन श्रीसम्पत्ति खर्च यायेगु निर्णय जुई
धका भातम्हेसिनं प्रस्ताव तल-

‘बुद्ध-धर्मया नामं कपूसिन्हाय् स्वां पिईगु, वैष्णव
धर्मया नामं तुलसी पिईगु, श्व निगुलिई गुगू न्हापालाक
अंकुर चुलिजाया वई उगू धर्म ग्रहण यायेगु धैगु निर्णय
जूगु जुल ।’ थुगू प्रस्तावयात सकसिनं मनासिव ठहरेयाना
उगु ‘सत्याधिष्ठान’ अनुसार थःगु छेँ कःसी च्वगु गमला
छगले कपूसिन्हाय्स्वां व तुलसी निताना नायंतया स्वांमा
पिना स्वःगु बेलस न्हापालाकहे कपूसिन्हाय्स्वांनि, अंकुर
चुलिजाया वःगु खनेदत । अले, निगुपक्षसियां निविवाद-
पूर्वक शंका समाधान जुसेलि निम्हतिपुयां तस्सकं हर्ष
जुयाव छगुहे विचार छगुहे चित्तयासें श्रद्धाभक्ति निश्चय
तया धन्य ! धन्य !! वसपोल सम्यक्संबुद्ध भगवान धका
थव पुर्खापिन्सं दयेका थकूगु भास्करदेव संस्कारित श्री
हिरण्यवर्ण महाविहारस विराजित श्री शाक्यमुनि बुद्ध
प्रीति याना अनेक पूजा गुठी द्वहलपा, हनं यलदेशस प्रति-
ष्ठित सम्पूर्ण बौद्ध विहारया सकल सम्यक्देवता दीपंकर
तथागत बुद्ध बोधिसत्व आर्यतारा आदि व आर्य बौद्ध संघ
(चैलक, आमणेर ब्रम्हचर्य भिक्षु, शाक्य भिक्षु तथा वज्रा-
चार्य) सकलयात निमन्त्रणा याना विधिपूर्वक लिचाय्का
स्वागत सत्कार याना फाल्गुण शुक्ल तृतीयाया रात्रिस

इतिलहने शुद्धभूमि इल्हनेननिस शोभायमानपूर्वक बिज्याका दीपदान बिया रात्रिजागरण पूजायानालि श्वयां सखुन्ह फाल्गुण शुक्ल चौथिया दिनस सकल निमन्त्रित देवता व बौद्ध संघपिन्त यथाविधि अनुसारं सम्यक्दान व सम्यक्-भोजन याकूगु जुल ।

थुगु सम्यक्दान भोजन गुठी परन्तु चिरस्थायी जुई-केत गुम्ह खः श्रद्धालु दानपति भलीभारो थकुजुनं सप्पा लुं जूगु महान् उपलक्षस अत्यन्त हर्षोत्साह जुया उगु धन श्रीसम्पत्तियागु सहायताद्वारा आपालं जग्गा आयस्ता प्रीति-यासं आवश्यक सरसामग्री व स्थिति वन्देजनं दयेकालि द्यैदसं इल्हने सम्यक् न्यायेका वईच्चंगु जुल ।

खजा वंशावलीस उल्लेख याना वईच्चंगु दु- द्यैदसं सम्यक् न्यायेका वईच्चन धका धासनं छुं कारणवस परि-स्थिति मव्यूगुलियाना वर्तमान सम्यक् न्यादय् छक जक जूवन । तथापि हिरण्यवर्ण महाविहारया सर्वसंघपिगु उदारता त्यागशील भावनां याना गुगू परम्परायात थौतक यथा श्रद्धानुसारं सम्यक् स्थिति चलेयाना वईच्चंगु जुल । आशा दु- थुगु विशुद्धकीर्ति बौद्ध संस्कृतिया महान्पर्व उत्सव- बुद्धजीवन, बुद्धदर्शन, बौद्ध कला, बौद्ध संस्कृति जाया च्वंगु अन्तर्राष्ट्र बौद्ध जगते थःगुहे विशेषता व महत्व दर्ईच्चंगु थुगु सम्यक् गुठी सदां अटल जुया चबनेमा ।

इल्हने सम्यक्या ज्याइवः

यल इल्हने नागबाहालस न्यादँय्छकः जुईगु सम्यक्धर्म परम्परानुसार चलेयाय् निम्ति इल्हने सम्यक्स सम्यक्-पालाःतयसं दछिया गुलि गथे थितिरीति चलययाय् माःगु खः, उगु विधान रूलनियम न्हापायागु पुलांगु पनीरुफू धलःपौ अनुसार थन उल्लेख यानागु जुल-


१) इल्हने सम्यक्या पाला च्याम्हसिनं पाब्ब लः ल्हायगु जुई वैशाख शुदी ३ स ।

२) पुलांपि न्ह्यथुवाल पालातय्सं न्हूपि पालाःपित बुं क्यतेयते, बजि म्हय्न् नवयमाल । यँलाथ्व ४ स ।

३) कच्छलागा १४ स पिनेवना सिन्दूरार्चन- पूजा यायेत श्रीनैरात्मा गुह्येश्वरी साला ह्ये, उगू स्थानया सिमाकचा ज्वना वयेमाल । थुगु पूजास श्रीचक्रेश्वरआजु, बेताआजु व पालाकः च्याम्हं वनेमाल दँय्दँसं ।

४) न्हूगु बालि दुहांवयवं यच्चिदचः काय्माक्वथासे न्हूगु जाकि न्हूगु, छो छाय् यने ।

१. थुगु धलःपौ स्वर्गीय श्री हेराकाजि शाक्य (कसाः) जुया सौजन्य प्राप्त



न्या दैप् छकः न्याइगु यलया सम्यक्स विज्यापिं बुद्ध व दिपंकरपिं

2. 2

2.

2.

2.

५) सम्यक् न्याइगु दँ खुलान्हाव यँलाथ्व ४ स मरी-
कःमितय मरी छुयत छोपूजा यायगु ज्या जुई ।

६) श्रीपञ्चमी खुन्हू मरीकःमो नायःत दया दिगिस
भुतूप्वा दय्कः वई । लिसें पूजायाना सम्ह्य नया वनी ।

७) थुखुन्हूसंतुं सम्यक् निम्ति ज्वरजाम यायेत
भन्साले सुपौ चिनेगु ज्या जुई । थुक्रिया लागि माक्क सु
म्ह्यतसें हया बिई ।

८) श्वहे दिनस कोन्तिया पोहोतेयेत माःगु दस्तूर
बिया छ्वये ।

९) सिल्लाथ्व १२ स मरी छुनाया मरीकःमित येतः
न्हापायार्थे दस्तूर पुरेयाना बिये ।

१०) सूमरी छुनाया हिलापूजा याये मरीकःमि तयेतः
आवश्यक दस्तूर बियेमाल ।

११) लाह्लिमरी वालेगु निम्ति पूजायाये, लाह्लि छगः
या गुतोला हिसावं गुलिचिने । सिजफे ६ फायात प्याकु
तया उकी चाकु तथा २९१ घ्यः ९२ सुंठचूँ ९१ मलेचूँ ९२
इमुचूँ ९२ तथा भाग मिलेयाना ववन्हास तथा वाले । वालागु
पुलुप्त तथा थूतुलायने । थुक्रियानं दस्तूर बिये ।

१२) सिल्लागा ६ स नागराजया जीवन्यासं लिका-
यगु जुई । लिसें विधिवत् कार्यकर्ता चवना जीवन्यास
तये । थुमितनं दस्तूरकथं भोजन याके ।

१३) सिलागा ८ स वज्रकःमि तयमाल । चार्चि
ध्वये सिमधतले न्हिथं दस्तूर अनुसार नकेत्वंके ।

१४) चित्रकारीयातनं दस्तूरकथं नकेत्वंके यानालि
निम्न अनुसार रंगया दस्तूर पुरेयाये—

मंस १ च्वलुं, हिंगुलि सिन्हपुरी ५, मसिमना ॥ म्हासु
सिन्ह तोला ४, भुयूसिन्ह तोला १६, नील तोला ४,
बलः तोला ४, जंगारी तोला ४, मायूरी तोला ४,
न्यापि ताक्चा माछि ह्ये ७ व ६ ।

१५) सिलागा १२ स विजयोत्सव ध्वज योसिं स्वाना
हलिपताः ब्वयके । थुगु ज्यास नायोजु ३० म्ह, मूबाहा-
याम्ह २ बेताजु २ चितिया २ सुवा १ थुमितनं दस्तूर
अनुसार मान्यता याये ।

१६) सिलागा १३ स भलिचिने यातनं क्वाचपाल-
देवता, वतातले, दिगियात विधिये पूजा याये । थुगु कार्यस
नायोजु ३०, बेताजु २, थायपा १, मूबाहायाम्ह १, कुति-
बाहाया चितिया २, थकूजुजुया ४, विसःया ४, सुवा ४
थुलि यातनं मुजुमरी बियमाल । पालाःया दोजं ८ पालाः
या थःथः गुरुजुपि ८ यातनं मुजुमरी बिये ।

१७) सिलागा १४ स मरी नैस्वकेयात झिम्ह आजु,
बेताजु १ बाहाःपाला १, मूबाहाया थायपा १, अथबाहाया
थायपा १, इता कुतिबाहाया चितिया २, थकूजुजुया ४,

सुवा ४ थुलियातनं मुजुमरी बिये भोजन याके ।

१८) सिलागा १५ स नीतपूजा वनेयात लालुसि
घेना शुचिनिचि याय, नायोजु १०, बेताजु १, मूबाहा
अथवाहा २, ईताकुतिबाहा २, सुवा ४, लाकामि २,
छोयलाभू याके, नौयातनं कौलाबजि बिये ।

१९) चिलाथ्व १ स यचिस्वने द्चोसाला ह्ये- श्री
क्वाचपाल देवता, श्री वज्रसत्त्व, श्री ओततले आजु, श्री
दिगिआजु, श्री क्वालखु गणेश, श्री सिकबही, पालापिनि
श्री आगम देवतायात विधित्थे दिगिस यचि स्वने १५० म्ह
देवतापि उपस्थित याये ग्हिथं बहनि मत बिये ।

२०) नीतपूजा वने चिलागा १ स पालाथकालि वना
क्वाचपाल आजुयात पूजाया अर्घबियालि क्रमशः श्री
वज्रसत्त्व, श्री योगाम्बरस व दशस्थवीर आजुपिन्त ग्वय,
लवं, दक्षिणा, किसली बियेमाल । श्री क्वाचपाल, श्री
योगाम्बर, श्री वज्रसत्त्व, यलया झिच्याबाहास किसली
पिण्डपां, निसला, छायमाल । बेताजुं दिंपौ ब्वनी, चिति-
यानं दिंपौ ताई । थुगु कार्यस काहाबाजं नायबाजं थाय्का
आजुपिं झिम्ह दिगिया आजुपिं २०, द्चोपाला १, मूबाहा,
अथबाहाया थायपा २, बेताजु २, सहित जुसे पूजाकु
कुबिईपिं सुवा ४ लकामि २ समेतं निमन्त्रणा वने । लिसें
ईबहीया कचाबाहानं वने । तंगबाहाया श्री वसुन्धरा-

देवीयात अर्घस दक्षिणा पंचरत्न तथा २४ कः अर्घं याये ।
 लिसैं कान्तिपुर ईतुं बाहा, भक्तपुरया आजुद्वःयात नं पाला
 वना साधिकसंतुं निमन्त्रणा तिकःवने माल ।

निमन्त्रणा अथबाहलं ववचायका इल्हने थुसा महा-
 देव, नागराज २, भन्सा गणेश ववयना आजु व दिगिया
 आजु अजियात समेतं छाया लिहांवये । थतिथें नके त्वके
 याये ।

२१) चिलाथ्व १ स भलिदेवता काःवने बहनि भलि
 थकालि कलपूजा ज्वना हःखा कुंदबूया न्ह्यःने च्वंम्ह गणेछ
 साला ह्ये , बहनिनिसैं मत बियेमाल ।

२२) खुरवाहि छोये थुखुन्ह चान्हस सुवात वया
 पंचोपचार पूजाभः सादुरु, पुवाकि, हाम्वः, चाकु, इमु,
 चिपालु बिये लिसैं नागपों, पँत्वा, सिफं, सुकुन्दा, चौमरी,
 मुजुमरी, आसंखलि कापः व दक्षिणा दस्तूर बमोजिम
 बिये । थुपि लिहांवया भन्सालस स्थापना याई । भलि व
 लकामितयेत ववयना पूजा सिमधतले दस्तूर पुरेयाये ।

२३) चिलाथ्व २ स सुथसियापू जा सिधय्का लसकुस
 याईपि गुरुजु ८ सिनं महादीप, छत्र दयके वहनि सुवानकि
 २ समेत झिम्हेसितनं छोयलाभू याके । लइ सुखू मनेतः
 माक्व बिया छवये ।

२४) चिलाथ्व ३ स लैक्वे खुने, दोखंमू छथल लैसू-

यात हिं तोला १॥, जी मना १॥, मलेचुं मना १॥, सुंठ-
चुं मना ४, इमुचुं मना ४, चि मना १॥ चिकं कुले ३, हलू
मना १॥ थुगु कार्यस थकूजु बिसः च्वना याये थुमित
भोजन याके ।

श्री क्वाचपालदेवयात हःडुगु पँ २ गः, केरामाँ २
नागराजयात जक ति पु २ हयेमाल ।

२५) थुबुन्हसं सम्यक्देवता बिज्याकेया छ्वेलाभूयात
आजु १०, बेताजु १, बाहापाला १, चितिया २, मूबाहा
अथबाहा २ यात मरी नँस्वका भोजन याके मूजु बिये ।

इल्हने ध्वाखास इलाँ प्यनेमाल । सुथस तंगबाहाया
श्री वसुन्धरादेवीयात कलःपूजा याना च्वलुं पाये । बहनि
काहाबाजा, नाय्बाजा, धा, खिँ थाना मुस्याःप्वा मत
ज्वना लँस्वया जात्रा याना हये । मंगः लुं ध्वाखास थ्यंका
साहपौछेभरीनं पूजा यानालि उपस्थित सम्यक्देवतापि
मर्यादाक्रमथें बिज्याके जुल । थुमिगु शिष्टाचार निम्ति
क्वाबाहाःया कजी सम्यक्देवता व्वाल्खुस लँस्वका तये ।
इल्हने ध्वाखास विधिपूर्वक द्वाल्याख, कलश, तिप्वामत
च्याका गुरुजु ८, सुवानकिं निम्ह २ च्वना लसकुस याये
पञ्चताल बाद्यसहित । सुलिमया थकाली ब्रम्हुजु वया
स्वागतद्वारस च्वना वेद व्वने । लिसेँ पञ्चतालस नन्दी-
कायेतनं दस्तूर बिये ।

२६) थुखुन्हूसं महादीप मत छोय्केयात चक्रेश्वरजु, बेताजु, थाकुलि च्वना श्री क्वाचपाल देवताया न्ह्यःने विधिकथं पूजायाये ।

२७) थुखुन्हूसं नागफलेचास पञ्चराज्वलं जाकि ल्ह्ययके । थुगु दानज्वलं सामग्री ल्ह्यइपिं सम्यक्या म्हय्त थेंसियापिं जुल । नागफलेया नागराजयात खादलु २ व चाया त्वाःदेवा पु २ अविछिन्न च्याकातयमाल ।

२८) थुखुन्हूसं बहनि उपस्थित सम्यक्देवतापिं विज्या-केत द्यःम्हपतिकं पुलु १, आसँखलि काप १, आसँकि जाकि त्वा १, द्यः कि भु १ व सम्यक्दःया संरक्षक जुयावईपित चासि बिये । चासि बियेत गुहालि वईपिं चितिया २ म्ह, इल्हने तारेमाम् भजनखलःपाखें १० म्ह, नकवही न्याचूपाखें १० म्ह, हःखा पाखें १० म्ह जुल ।

२९) चिल्लाथ्व ४ स सम्यक् न्याय्कीखुन्हूया विधि थितिरीति थथे जुलः—

[क] श्री क्वाचपालया थास जज्ञहोम याचके चक्रेश्वरी बेताजु थकाली च्वने ।

[ख] थुमिसंतुं यच्चिदेव पूजा याके ।

[ग] भन्सालस न्हिनिस्तेथे पूजा याये सुवातय्सं ।

[घ] थकूजुजु, बिसः व सुवा च्वना महाप्रसाद सम्यक्जा थुयेके ।

[ड] आगँबौ थापँकि चुबूजाकि ६ फा, छथि बीयात चुबुजाकि ६ फा, बौपूजा यायेत न्हेपंदूगु खासि १ गः च्याःमदूगु भेगः ८ गः, बौखवा, क्वेखचाः आभरण पताकादि सामान बिये । काहाबाजा नाय्बाजं थाका लंकामितेसं कुबियेका स्थान स्थानान्तरस बलि वाय्के छवये ।

[च] महाप्रसाद सम्यक्या जाथुयेत इखाछेंया नागपूजा आधिकारिक गुरुजुपिं वया कलश पूजा याये । पूजा-ज्वलं जा जयमांपिसं बिये । पूजा सिधयेवं गुरुजु, जयमां, पाला सकसितं दस्तूर अनुसार भोजन याके ।

[छ] क्येँता तइपिं सलिछें, मिखाबाहाया धँगू १२ यात नौ १२ सें लालुसि ध्यनके थुमित ववःचिकं, न्हायकं, थकूचा, लिबिचा, पुवा तया दस्तूर बिये । लालुसि ध्यनेवं इल्हंने हितिस म्वःल्हूये । पथुलिस इल्हने जोशि थकार्लि नन्दाभद्रा च्वकेमाल । बहे धंगूतय्सं क्येँता १२ ता तय्के छु छु धासा— पालु, म्वा, भुति, कःसू, पःमाय्, मू, माय्, कलँचा, अमालि, खा, छोंसुखु, लैबये । थवया लिसे मरीकःमितय्सं ध्यः साखः तय्के । थुमितनं दस्तूर बिये । अथेहे नौ तय्त नं ।

[ज] भन्सालस माःगुज्या सिधयेकालि थकू जुजु इल्हने

हितिफुस च्वंगु सिंहासनस बिज्याका छत्रंकूजु दश
 स्थवीर आजु, १० दिगिया नायःजु २०, मूबाहाया
 थपाजु १, अथबाहाया थपाजु १, बेताजु १ यात
 थकू जुजुं लिख्य चायके बिये धुसैलि मूबाहाया
 थपाजुयात कुन्हाकलश व अथबाहाया थपाजुयात
 घण्ट लःल्हाये धुनेवं काहाबाजा नाय्बाजा थायेका
 भूमिशोधन याये । भूमिशोधन सिधयेवं थुमित
 साखःति चिपं थियके जुल ।

[झ] यम्पिथ्री महाविहारया पञ्च स्थवीरयात जक पाला
 थकालिपा मनुखं इल्हने दिलक्व चिबाहाया न्हःनेसं
 लिख्यःचायके ।

[ञ] उपस्थित मुनिपुङ्गव दीपङ्कुर तथागत सम्यक्-
 देवतापिन्त पञ्जरां फय्केगु छायछि यायेगु दानज्वलं
 क्वय् धलखे च्वयागु अनुसार कमाकथं दस्तूर बिय-
 माल जुल ।

सम्यक्देवता	जाकि पासः	स्याबजी पासः	वाजु चित्तागु मथ	लारी सूमरी
थामं देव श्री स्वयम्भूचैत्य	५	५	५	५
गुरुवज्रसत्त्व मुख	३	३	३	३
गुरुवज्रसत्त्व मुकूट	२	२	२	२

सम्यक्देवता	जाकि पासः	स्याबजी पासः	वाज चित्तागु मथ	लारी ममरो
भेगः आजुदेव	४	४	४	४
क्वजि आजुदेव	४	४	४	४
वसुन्धरामाजु	१५	१५	१०	१५
चोबाहादेव	१५	१५	५	१५
बुंगदेव	१५	१५	७	१५
चासंदेव	५	५	३	५
चक्रबाहादेव	८	८	४	८
लगँथूर	१०	१०	×	१०
तंगबाहा तारा	२	२	×	२
तंगबाहा	६	६	४	६
कोबाहा	६	६	×	६
घुंबाहा	१२	१२	७	१२
चुकवाहा	८	८	१०	८
कुलिमबाहा	८	८	३	८
नील थुसा				
क्वाबाहा आजु भलिभारोसमेतं	१६	१६	१६	१६
बाहापादेव	४	४	२	४
ओबाहादेव	१०	१०	७	१०
दोबाहा	८	८	७	८
तःबाहा	८	८	१३	८

सम्यक्देवता	जाकि पासः	स्याबजी पासः	वाजु चितांगु मथ	लारी सूमरी
बूबाहा	८	८	१९	८
हगुबाहा	१०	१०	७	१०
ज्योबाहा	१२	१२	×	१२
गुजिबाहा बुंगदेव सहित	१२	१२	२०	१२
भिछेबाहा	८	८	×	८
उकुबाहा	१२	१२	७	१२
सुबाहा तारा ४ समेत	१२	१२	१६	१२
यच्छबाहा तारा समेत	१०	१०	६	१०
कीर्तिपुर तारा समेत	१०	१०	५	१०
जतिबाहा तारा समेत	१२	१२	४	१२
चोबाहा	८	८	×	८
कीर्तिपुर सम्यक्देवता, तारा	८	८	×	८
जदेबाहा तारा	२	२	×	५
कीर्तिपुर तारा	२	२	×	५
अनसंतु तारा	२	२	×	२
उकुबाहा तारा	४	४	×	४
अनसंतु तारा	२	२	×	२
भिछेबाहा तारा	२	२	×	२
गुजिबाहा तारा	२	२	×	२
अनसंतु तारा	२	२	×	२
ज्योबाहा तारा	३	३	६	३

सम्यक्देवता	जाकि पासः	स्याबजी पासः	वाजु चित्तांगु मथ	लारो सुमरी
अनसंतुं तारा	२	२	×	२
हगुबाहा तारा	२	२	×	२
अनसंतुं तारा	३	३	×	३
बूबाहा तारा	२	२	×	२
उकुबाहा तारा	२	२	×	२
तःबाहा तारा	३	३	×	३
तःबाहा तारा दीपङ्कर	४	४	×	४
दौबाहा तारा	२	२	×	२
ओंबाहा तारा	२	२	×	२
मिच्छुबाहा देव	४	४	४	४
जा जयमाँ	६	६	४	६
यताबाहा	६	६	१	६
दारिकाबाहा				
छतखाबाहा	६	६	४	६
इखाछेंबाहा	६	६	×	६
चुकबाहा तारा	२	२	२	२
चुकबाहा तारा दीपङ्कर	३	३	×	३
आनन्दबाहा	६	६	२	६
मिखाबाहा तारा	३	३	४	३
अकिबाहा	३	३	×	३
अथःबाहा	३	३	४	३

सम्यक्देवता	जाकि पासः	स्याबजो पासः	वाजु चित्तागु मथ	लागी सुमरी
मूबाहा	४	४	४	४
चिलंदेव	६	६	६	६
थ्याकाया तारा	२	२	×	२
न्याखाचूया तारा	२	२	×	२
कमलाय् आजुतारा, मैत्रिध्वज समेत	२०	२०	२०	२०
हिलाय आजु तारा समेत	८	८	२०	८
वनबाहाया दीपङ्कर कुनःआजु	६	६	२	६
हौगःया दीपङ्कर तारा समेत	८	८	×	८
वादेया दीपङ्कर तारा समेत	८	८	५	८
बूबाहा दीपङ्कर तारा समेत	८	८	५	८
सिबाहा दीपङ्कर	८	८	६	८
सिबाहा कचबाहा दीपङ्कर, तारा	६	६	×	६
सिबाहा दीपङ्कर	३	३	×	३
भायो आजु दीपङ्कर तारा समेत	८	८	२	८
मूबाहा दीपङ्कर तारा समेत	९	९	×	९
चिवाहाचुक कनकजु तारा समेत	८	८	४	८
भिक्षु आजु	६	६	×	६
ईवहीया दीपङ्कर थामंदेव समेत	९	९	४	९
भिठेबाहा दीपङ्कर, तारा समेत	८	८	४	८
सुवाहा	८	८	१६	८

सम्यक्देवता	जाकि पासः	स्याबजी पासः	वाजु चित्तागु मथ	लारी सूमरी
थकूबाहा थकूआजु	८	८	×	८
ईलायबही दीपङ्कर	६	६	×	६
धुंबाहा				
तःबाहा दीपङ्कर	६	६	×	६
यताबाहा कःमि आजु	९	९	५	९
धर्मशील आजु	१२	१२	७	१२
दिनपाणि आजु	३	३	१	३
भानसि आजु (प्याग्लाँ)	१२	१२	७	१२
मुनिधं दीपंकर, तारा (धाखा)	१२	१२	४	१२
धर्मध्वज आजु तारा समेत	१२	१२	४	१२
बेखाराज धूसः तारा समेत	६	६	×	६
गजेन्द्रवज्र तारा समेत	१४	१४	४	१४
दानमुनि धाखा तारा समेत	१५	१५	४	१५
बागनरसि (ईकु) तारा समेत	४	४	२	४
साखःति जयमां	३	३	×	३
जोग आजु हगूबाहा	३	३	३	३
क्वाबाहाया नापित	३	३	३	३
चिकूबही धनदत्तब्रह्मचर्य	३	३	३	३
ईतुंबाहा				
खवप आजुद्यः				

थनंलि पञ्चताल आदि सम्यक्था ज्याखँ यानाजूपि सम्बन्धित
कार्यकर्तातियेत बियेमाःगु दस्तूर जुल-

सम्बन्धित व्यक्तिपि	स्याबजी पासः	लारी सूमरी	जाकि पासः	बा पासः
पञ्चताल	१२	१२	१२	२४
क्वाबाहा दाफाभजन	×	८	×	२४
इता कुतिवाहाया चितिया २	१२	१२	१२	१२
लसकुस गुरुजुपि ८ म्ह	८	८	८	८
इल्हने बाजायात	५	५	५	१२
दक्षिणा ३२ मुजुता १२ धेवासुका ॥				
भन्सा आगँयात	१२	१२	१२	×
मुवानकि ६ म्ह	६	६	६	६
लकामि २ म्ह	२	२	२	२
नागराजसाधक गुरुजु २ म्ह	६	६	६	६
मरीकःमि कन्हा डा	३	३	३	३
थुसा महादेव	१	१	१	१
योसि	×	१	१	×
नागराज २ म्ह	×	२	२	×
दिलको देव	×	१	१	×
भन्साया गरेश	×	१	१	×
इलांननि गरेश	×	१	१	×
दशस्थवीर आजुयात १ पुलु	×	१	१	×

सम्बन्धित व्यक्तिपिं	स्याबजी पासः	लारी सूमरी	जाकि पासः	वा पासः
----------------------	-----------------	---------------	--------------	------------

मूबाहा अथःबाहाया थपाजु २ म्ह

यात २ पुलु

२

२

२

दिगिया २० स्थवीर आजू म्हति

×

१

×

१

चक्रेश्वर आजु जज्ञयाम्हायात

×

१२

×

१२

यचि थापनाया चक्रेश्वर १ वेताजु

१२

फँ ३

१२

वज्रकःमियात

१२

१२

चित्रकारीयात

×

×

८

८

दिनपौ च्वम्हयात थेवा ३

×

×

फँ ३

१२

वेद व्वनीम्ह ब्रम्हजुयात

लारी १ सूमरी १ वाजु १

पुलु १ जाकित्वा १ कचि आपा ४

कलिचा सिं १ दक्षिणा ३२

पातँ धौ १ बजिकू १ साख २

मरी फलफूल विये ।

×

×

×

×

थकूजुयात स्वाँतये मुजुता १५

×

५०

×

१०

विसःयात मुजुता ८

×

×

×

×

इल्हने जोशियात

×

२४

१२

×

श्री ५ महाराजाधिराज

नारायणहिंति मुजुता ५

×

५

×

५

छेभरी साहपौयात

मुजुता ६

×

३

×

६

सम्बन्धित व्यक्तिपि	स्याबजी पासः	लारी सूमरी	जाकि पासः	वा पासः
जा जयमां स्वांतय स्वथश्रेष्ठ	×	३०	×	१२
थथु तःइया श्रेष्ठ	×	८	×	×
नवथु तःइया श्रेष्ठ	×	८	×	×
ग्वाछे माहाँ माःजु	×	६	×	×
स्वथ पँमा	×	२	×	×
त्वाःमाहाँ	×	×	त्वा ४	४
सलिछे ननिया ज्यापु १८ बँपुईपि	×	×	त्वा १८	३६
कोन्ति काहाबाजा पुईपि	×	४	त्वा ४	४
नाय्बाजा थाईपि	×		त्वा ४	४
तापाहितिया नाय्त बँपुईपि	×	×	त्वा ९ बाजु ९	
लिविचा हईम्ह तापाहितिया				
नाय् घेबा १२	×	×	त्वा ४	४
जोसा हईम्ह कोन्तिया पोढेयात				
स्याबजि फँ ४ जाकित्वा १२				
घेबा १२ वाजुमरीता १२	×	×	×	×
सम्यक्या म्हयेतयेत म्हति जाकि				
त्वा १ लारीजो १ वाजु ता १	×	×	×	×
धंगू १२ म्हयात जाकित्वा १२				
वाजु ता १२	×	×	×	×
नौ म्ह १२ यात त्वा १२ वाजु १२ १२		×	×	×

३०) यच्चिद्यः लितये चिलाथ्व ५ स चक्रेश्वरी दश स्थवीर आजु दिगिया आजु २०, अथःबाहा मूबाहा २, चितिया २, बेताजु १, बाहापाला १ थुंलयात दस्तूर बिया भ्वय् नके ।

३१) भलिदेव लितये, चिलाथ्व ६ स विधित्थे पूजा-यायेमाःपिन्त माःगु दस्तूर बिया भोजन याके ।

३२) चिलाथ्व ७ स योसिं लिये, आजु ३० बेताजु, चितिया, मूबाहा, अथःबाहा, सुवात समेत च्वनालि थुमित नं दस्तूर बिये ।

३३) चिलाथ्व ७ स क्वयनापूजा याये । क्वयनाद्यः सालाहया बकछिमाथं पूजायाये, चचाहाले । दश स्थवीर, बेताजु, मूबाहा, अथःबाहा व चितिया अले पालातय् गुरुजुपिं च्वना चर्यागीत हाले, भ्वय् नके लिसें सुवा सुवानकिं लःकामि व मरीकःमित प्रभृति नकेमाल जुल । पाला च्याम्हेसितनं मरीकःमितेसं सःता भ्वय् नके यने जुल ।

क्वयनापूजा सिधय्का लिहांवयबले थासँ थासे लिख्यचा याये, पूर्णचण्डीस पूजा याये । अनंनिसें थुगु यलया बौद्ध सम्मेलन सम्यक् समारोह सुसम्पन्न जूगु लसताय् आमोद प्रमोद पूर्वक वज्रयानी गीत चचा हाला हाला लिहां वये । इल्हने भन्सा, इलांननि, ससुननि, दिगिस वना कलःपूजा याये । थुमितःनं दस्तूर बिया मङ्गलगाथा व्वना मङ्गल

उत्सव याना सम्यक्धर्म परिसमाप्त जूगु जुल । अन्तस
थुगु महान् पुण्यकार्य सम्यक्धर्म यानागुद्वारा प्राप्त जूगु
कुशलमूल निम्नगाथा परलपा बोधिपरीणामना याये जुल ।
थुगु सम्यक्धर्म दिशा शिगु, बखत स्वंगु, मङ्गल सुख प्राप्त
जुया, अन्तस सकलप्राणि अनुत्तर बोधिज्ञान लाभ जुया
श्री दीपङ्कर तथागतपिंगु भुवन सुखावतिस वास लार्ईपि
जुयेमाल । शुभम् । अस्तु ।



बोधिपरीणामना गाथा

सकल जगत्प्राणी हर्षचित्त जुयाव
प्रतिदिन जुयेमाल बोधिचर्या तिसापि ।
शरीर व मनयागु दुःखनं पीर जूपि
हर्ष सौख्यया सागर लायेमाल अतूतं ।
गुलीत नरकभूमि लोक धात्वी दयाच्चं
थुगु नरकभूमि हे दुःख सिया व च्चंपि ।
श्व सकलजन प्राणी थों यानागु श्व पुण्यं
सुख दुगु भुवने हे मोज हर्षं च्वनेमा ।
मिखा न मखनपिन्त रूप छने दयेमा
ह्लयेपन मदुपिन्त शब्द ताय दयेमा ।
गरभस दव स्त्रीया मायादेवीया थेंतुं
सुखन मच्चा बुयाव पीर व्यथा मदयेमा ।
गुगु गुगू ययाच्चन उगु उगू सदानं
सकल हित ज्वीगु सौख्य भोग लायेमा ।
अति भय जुवपिन्त निर्भय जुयेमा
शोक जुव जनपिन्त प्रीतिलाभ दयेमा ।
त्वय जुस्य च्वनपिन्त रोगनाश जुयेमा
जनपनि कुनातःपि बन्धनं मुक्त जुयेमा ।

बलमदु जनपिन्त लायेमाल तव बल
 थिथि थिथि जनलोक प्रेमचित्तं चवनेमा ।
 गुगू गुगू मनं भाषा लेंजुवपिन्त आव
 थुगु थुगू जतनहे सिद्ध ज्वीमा सदानं ।
 समदर खुशि दुंगा चवर्नपि प्राणिपिन्त
 बिघ्न भय फुनाव सिद्ध ज्वीमा मनोरथ ।
 दुरगबनस लाना मार्गभ्रष्ट जुवर्पि
 सकलजन पनिस्त सार्थ नाप लायेमा ।
 त्वगिजन बनभूमि ज्यादा संकष्ट जूर्पि
 जनपनि सकस्यातं देवतां रक्षा यायेमा ।
 सकल अनि मर्भिगु अक्षणं मुक्त ज्वीमा
 अतिमन भिनकाव श्रद्धा प्रज्ञा कृपानं ।
 अतिनं भिनगु आकार भिगु आचार लाना
 सकलजन जुयेमा पूर्वजन्म लुमर्पि ।
 फुयिमखुगु भंडार यावदाकाशर्थे हे
 सकलजन पनिस्त तुल्यजोरा मदुगु ।
 थव खुशिदुगु मेवं स्यंके सफूगु ज्वीमा
 सकलजन समस्तं रूपवेगादि गुण ।
 मदुपनि गुणज्ञान नीच जुयावच्चर्पि
 थुगु सकल समस्तं पूर्ण जुयाव नित्यं ।

अतिरस सुखनहे मोजयाना चवनेमा ।
 घमन सकल गुमान नाश जुया वनेमा ।
 सकल मनं तुनागु सिद्ध ज्वीमा समस्तं
 मभिनगु सकतासं प्रीतिरक्त मजूसे ।
 धरमस जक सदानं सर्वकालं यायेमा
 मनस जक सकस्याहे बोधिचर्यास लाना ।
 तन मन जुयेमाल बोधिचर्या सदानं
 सुगतगणपनिसं ग्राहयाना कयाव ।
 सकल छुटे ज्वीमा मारया कर्मयाकें
 सकल जन समस्तं दीर्घ आयु जुयेमा ।
 सुखन सकल प्राणी नित्यकालं स्वानाव
 विघन भय समस्तं मृत्यु शब्द मदयेमा ।
 मनस रस दइगु कल्पवृक्ष सहितगु
 सकल दश दिशास पूर्णज्वीमा बगैचा ।
 दुःख त्राश भयशब्द मदयाव सदानं
 धरम शब्दनहे जुयेमाल मनोहर ।
 थव थव दुगु शोभां बोधिसत्व बिज्याना
 सकभनं थुगु भूमि व्याप्त जुया चवनेमा ।
 सकलजन पनिस्त सर्वकालं सदाहे
 सुगत व भगवान्या पुत्रपि नाप लायेमा ।

उलिथुलि मदयेक पूजाया मेध याकें
 जगत गुरूपनिस्त पूजायायेमा सदानं ।
 बखत बखत ज्वीव देवतां वृष्टि यायेमा
 सुभिक्ष शुभ जुयाव शस्यसंपत्ति दय्मा ।
 चतकनं शुभमंगल लोकपिन्त जुयेमा
 धरमस रतियाम्ह राजा ज्वीमा सदानं ।
 समरथ दयेमाल औषधी दक्क जातया
 जपितपि मनूतेत मन्त्रसिद्धि लायेमा ।
 अतिन मन भिडमाल डाकिनी राक्षसादि
 सुंगुम्ह सकल सत्त्व दुःखी पनि मज्जीमा ।
 त्वय भय परयाकें पीर दुर्मन मज्जीमा
 अतिन भिन मन जूया निन्दायापि मदय्मा ।
 सुख व सुमन जुया दुःख दुर्मन मज्जीमा
 अतिन भिनक बोनेगु पाठलीला यायेगु ।
 सकभनं शुभ थान थीर ज्वीमा विहार
 ह्लिथन ह्लिथन नित्य संघ सामग्री दयेमा ।
 सुजन सकल पण्डित लोकसेनं हनेमा
 सकल दश दिशासं कीर्ति प्रख्यान्त जूपि ।
 बोधिसत्त्व स्वरूपि शुद्ध सन्तान दयेमा
 प्रमुदितनसें यावत् भूमि लाभ दयेमा ।

स्वंगु दुर्गतियागु दुःखभोग मम्वाक
 कठिनगु छुनं चर्या यायेम्वाक सदानं ।
 छगु थुगु तवधंगु दिव्य देह लानाव
 सकल जगत प्राणी हित सुख यायेत ।
 अनुपम सुख ज्ञान बुद्धतुल्य जुयेमा
 सकल दशदिशासं आकाश पर्यन्त दववं ।
 सकल जगतयागु अर्थसाधन यायेत
 गुगुकथं चलेयात श्रीगुरु मञ्जुश्री नं ।
 उगुकथनं सदानं श्वहे चर्या ज्जि ज्वीमा
 गुवलत च्वनि आकाश थीरजुया मफुसे ।
 उवलत च्वनि प्राणीयागु दुःख फुकेत
 थुवलत थीति जुयमाल सदानं ।
 सकल जगतयागु दुःख फुकेगु वासल्
 श्व सकल धनसंपत् सौख्य दय्का विईगु ।
 सकसितं अति सत्कार लाभसंयुक्त ज्वीगु
 रिपुभय मदुगु श्व शासनं थीर ज्वीमा ।



च्वमिया आःतक पिदने धुंकूगु सफूत

- | | |
|----------------------------------|---|
| १. श्रीस्वयम्भूमहाचैत्य | १६. इलन्हे सम्यक् |
| २. बुद्धमूर्ति छगु अध्ययन | १७. हिरण्यवर्ण महाविहारया पिण्डपात्र अभिलेख |
| ३. बौद्धनाथ स्तूप इतिहास | १८. रुद्रवर्ण महाविहारया तालपत्र अभिलेख |
| ४. महाबौद्ध मन्दिर इतिहास | १९. आर्यनामसंगीति, ताराशत, भद्रचरी |
| ५. बौद्धविहार व ग्रन्थसूची | २०. पूचः छगु अध्ययन |
| ६. बौद्ध शिक्षा प्रथम भाग | २१. आर्यनाम संगीति परिचय |
| ७. बौद्ध कला अनुसन्धान सूची | २२. नेपाल संस्कृतिया मूलुखा |
| ८. सम्यक महादान गुधि | २३. माणिगल राजप्रासाद |
| ९. त्रिभाषायुक्त आर्यभद्रचरी | २४. स्थिरोभव वाक्य |
| १०. रुद्रवर्ण महाविहार परिचय | २५. नेपाल लिपि संग्रह |
| ११. मयूरवर्ण महाविहार इतिहास | २६. नेपाल लिपि प्रकाश |
| १२. विद्याधरी विजयेश्वरी परिचय | २७. नेवारी वर्ण परिचय |
| १३. आर्यावलोकितेश्वर परिचय | २८. लिपि विकास तालिका |
| १४. वैश्रवर्ण महाविहार सं. परिचय | २९. कुम्भेश्वर इतिहास |
| १५. यटखाबाहा परिचय | ३०. लिच्छवि अभिलेख प्रकाश |

३१. मेडिभल नेपाल कोलोफोण्ड एण्ड इन्स्क्रिप्सन
सम्पादन - हेमराज शाक्य व तुलसिराम वैद्य
३२. श्री ५ महेन्द्र स्मृति अभिलेख
३३. विक्रम चरित्र नाटक,
सम्पादन - सत्यमोहन जोशी व हेमराज शाक्य
३४. डकुमेण्ट फ्रम दि रुद्रवर्ण महाविहार,
सम्पादन - बर्नहार्ड कोलभर व हेमराज शाक्य
३५. यलया विहार चैत्य व धर्मघातुया सूची
३६. न्हूदँया लसताय् भिंतुना
३७. श्रीरुद्रवर्णमहाविहारस्थित विभिन्न अभिलेखया सारांश अर्थ
३८. मचा जंक्वः बौद्ध विधिकथं
३९. बुंगमलोकेश्वरया सांस्कृतिक पृष्ठभूमि
४०. इल्हने सम्यक् इतिहास व ध्वया ज्याइवः